

景  
文  
集  
七











景  
文  
集  
七

宋  
祁  
撰



中  
華  
書  
局



# 景文集卷四十

表

## 代中書謝表

五芝封檢，忽頒星掖之文。六枳維邦，遽貳夏卿之秩。驟叨成命，若蹈嚴淵。竊念臣材不逮中，生惟薄祐，選協華之聖旦，託聞道于先師。淳濯槁梧之暇，蒙被菁莪之育。洪惟真考，顯訓儒猷。滌天覽于書林，匯化源于璧沼。誤咨艱拙，入備詳延。誠雖厲于月將，慮曷周于天咫。以規爲瑱，訖無助于四聰。有祿乘軒，但貽譏于十手。大明繼照，時敏事修。識姓名于皁表，軫慈憐于騎履。忘其多悔，擢以近班。日參桓郁之擁經，孤奉漢家之前席。矧惟兼領，殆有數司。外則閱四方之副封，次乃主一王之儀典。虞庠弦誦，領厥官聯。駟野驅黃，專其使局。顧寸長之易竭，徒多口之成尤。且復強力弗支，華顛寢薄。第家移病，時容襦被之歸。蒙笏書思，每代臨文之忌。賴九重之矜體，免萬坐于刑章。況在榮名，敢懷貪覬。迺蒙皇帝陛下，至仁格物，大度包荒。茲因炤祀之升禋，更錄微勞于飲至。以爲寧過而立，固愈于廢人。大德曰生，無容其歸報。罔僉羣議，特出宸謀。頒溫潤之厚辭，極龍光于邇著。下收枯木，備用于皇居。未極景風，先行于賞典。三循牆而靡讓，九復貫以何言。謹當內激誠明，仰祇猷訓。參一二而交戒，蔽三百于無邪。白璧可爲，慎守先儒之行。鳴雞不

已。庶無時夜之渝。極爾叢軀。期于上報。

代中書謝不允降官表

一昨緒求天意。傳致國章。引咎曠僚。祈恩貶秩。冀以奉大君之罪已。塞黎獻之攸箴。洪惟上仁。務全治體。諭以包荒之德。斷其昧死之章。違命莫諧。循幸兼極。竊念臣等共陳臚仕。獲對顯時。邁睿化之日昭。乏深謀而夕訪。罔能變定。迺及薦饑。屯甘澍于西郊。漫貪蟬于南畝。江淮土著。靡室靡家。齊魯力田。爲凋爲瘵。百賈皆震。九扈大殘。上軫如傷之懷。中濟何辜之困。切敕長吏。還定流人。振廩化居。緩征闕賦。因復省大庖之舉。聿遵古訓。減備冊之號。以獎至誠。過不下移。誼無文應。而臣等繫同休戚。均下慘舒。進見巖廊。與知彫日之誠。論思前席。親覲雲漢之憂。蔑陳稱報之方。自保宴安之地。遂圖降品。聊示責躬。答皇矣之臨觀。助勃然之興化。言關清覽。情盡懦衷。伏蒙皇帝陛下。深護汝疵。罔譏彼相。奪其小節。納以大猷。責孟明之忠。俾增厥政。重張武之賜。式愧其心。赦煩瀆于免冠。諭溫純于細札。靡加明黜。趣勉微功。臣等敢不進撫五辰。退求百度。開陳熙綽。革刻便文。漸臻玉燭之和。規復茨梁之積。少寬昧旦。免玷代工。庶依觀過之仁。得及知非之路。他官有始。捫舌何言。

代宰相謝傳宣入伏月令午正歸私第表

右臣等今月一日。中使傳宣。自入伏日。令臣等午正歸私第者。炎隆秉序。慈哲推仁。以畏日之方陽。且揮

汗之相屬。特容夙退。俾便私居。仍盡伏金之辰。始舉常參之限。仰銜優遇。交極感懷。況臣等曠位居多。計功無補。晨趨暮出。自有成規。趣駕先期。猥煩寬詔。欽服從人之惠。諒無蒙暘之疴。共誓交修。少圖稱報。

代石太尉謝令安州照管表

臣某言。八月日。安州進奏院遞到中書劄子。奉聖旨。已令本州常切照管者。寬大之命。下濟于天光。敲陳之軀。甫還于策魄。發誓若輝于龍燭。釋憂如出于虎蹊。撫續息以幸存。奉絲言而增惕。竊念臣本惟樸味。獲遴會昌。乏千里之折衝。憚四夷之方畧。程材六郡。獲預於良家。待罪天符。詎知于尺籍。先帝軫其單賤。勗以勤劬。靡試異于外庭。遽編名于衛署。宣威亭毒。屢分四杜之華。弭亂巴賓。曾預一夫之勇。未能陳力。深懼曠官。伏遇皇帝陛下。蒼震承休。珍圖纂業。將懋功而致貴。方右武以勸能。俄辱寵章。洊膺渥洽。乘輅出使。蔑施橫草之功。飲至勞旋。濫預策勛之爵。自爾奉簡。書而祇畏。飭師律以申嚴。克完犀利之兵。上副穆清之寄。累勞未驗。乃眷益隆。尋復盜起。坤維妖興。玉壘吳蛇薦食。竊弄于庫兵。泮樁未懷。敢稽于天討。而臣謬當深詔。躬佐下軍。受堂上之奇謀。制目中之醜敵。帝赫斯怒。貔貅方議于奮威。人得而誅。蟻蝨已聞于相弔。天聲大震。月捷繼聞。俄中戮于凶渠。俾維新于汧俗。集成巨伐。皆稟睿謨。若專徵臣。幾誤大事。乃至邊陲屢警。戎索戴嚴。鑒兵老上之庭。斬級雲中之塞。宸旌直指。殄嶓冢之星狼。革輅親征。見漢家之武節。分屯介士。防遏盛秋。臣實妄庸。獲膺任使。敢不深惟一得之慮。載施十駕之勤。備重耳之艱難。謹武

侯之節制。披堅執銳。志竭于寸長。斬將搃旗。誓當于一隊。旋屬穹廬納款。左衽通驩。兜零罷照于邊烽。督亢遄歸于內地。肇建和戎之策。茂臻偃伯之期。遂復第賞靈臺。酬庸盟府。當陽三接。屢榮錫馬之侯。列國十連。均仗齊壇之鉞。繼頌成命。出領大藩。而不能恪奉詔條。勤修職業。畔官離局。妄肆于矢言。殄行震師。果罹于昭憲。既具王庭之獄。請從蕭斧之誅。豈謂天意好生。皇明獨斷。屈成刑之端議。申肆眚之大猷。止外竄于遐圻。俾俯存于餘喘。念一介之賤。不忍加誅。廓三面之羅。與之更始。洪推大賚。曠絕常均。此際仰舜法之大寬。荷堯仁之不殺。挺身萬里。甘淪襁魅之區。齎志九泉。用塞喪元之責。未周成歲。尋霈鴻私。自臨賀之炎陬。徙房陵之內郡。假青宮之道候。給長府之廩錢。擢于錯鈇之中。齒乃衣纓之列。棄簪之賤。特軫于上仁。洞轍之波。彌涵于麗澤。仰繫大度。克庇微生。敢期再歲之間。復降自天之命。改陞環衛。徙置方州。蟠朽迴春。頓茂九陽之氣。幽潛發蟄。驟驚百里之音。夫何流宥之餘。獲覩光華之旦。斯蓋陛下阜昌景化。不闕寶慈。以臣久在戎行。屢持師節。管穴之見。雖無前筮之勤。犬馬之勞。不捨敵帷之報。特形隆旨。昭示守臣。俾自勵于操修。且深加于存卹。不寒之慄。潛釋于冰淵。垂暮之年。免墮于溝壑。事踰初願。恩極更生。再念臣抱疊以來。撫躬至熟。誠由爵位太厚。尸曠居多。失漢臣醇謹之風。冒道家干進之忌。寇至誰咎。器滿則傾。垂貽折覆之凶。上玷清寧之化。然而事君無隱。靡有于他腸。食肉寡謀。薦招于祗悔。由物情之靡協。致陰譴以自貽。每念前辜。敢忘終食。謹當上遵彛訓。克勵迺誠。用酬觀過之私。循致寡尤之地。屬桑

榆之日索。懼螻蟻之命輕。雖貪祿軒。深貸百鏹之贖。而褻尸馬革。愈堅十死之心。臣限以拘留。不獲躬詣闕庭。無任感激屏營之至。

代晏尙書亳州謝上表

〔案〕晏殊于明道二年以禮部尙書出守亳州。

初達四近。出守一麾。祇稟詔條。奉揚民政。擁左魚于官次。僦疲馬于君軒。揆寵循躬。兢榮慚刻。竊念臣本性孤遠。獲對盛明。因緣篆刻之微。陶被師儒之誨。先皇帝憐其稚齒。獎以片文。長育中陵之阿。每誠素絲之習。遂用謹敕。進服寵光。塗飾朱丹。滿除埃壘。乘人之乏。每食輒浮。始自書林。寢階辭掖。屬星渚之貳極。參震邸以爲僚。此際出入兩閨。遭逢千載。寧無越思之過。或有奇中之譏。大度兼容。多言訖息。入躋內署。彌邇清光。伏遇皇帝陛下。重協睿華。丕承淳烈。軫其舊物。謂無他腸。斷自宸衷。佐經樞筭。室大柱小。罕不撓之期。車重馭煩。有必顛之勢。果停密務。近守留都。旋沐召還。再加收試。南臺風憲之地。祕殿侍從之榮。咸叨踐揚。蔑有論報。擢司邦計。顯領使權。雖籠天下之財。罔紓縣官之急。遽蒙中詔。參預宰庭。忘申侯之有疵。用王譚于下第。論思在日。僴俛踰年。曾不能卓爾建明。毅然處可。引俊良而咸事。放險謁之庸違。開陳治端。總領羣職。而廊廟之任。方夏具瞻。政之無良。臣任其咎。陛下弗詢徐昉之免。罔責石慶之歸。人言則姑務納汙。天災則不令移過。括囊耽祿。久已自知。傷錦瘵官。居然衆驗。洪惟濬哲。終賜保全。屬當明辟之初。例舉均勞之典。懋官加等。作翰疏通。道路甚夷。風土差樂。恩護其短。誼不忍誅。再生之慈。有死無答。

重念臣夙陶雅化。粗識大方。蓋知一心事君。四體率職。惟書盡信。舍道弗營。勤保廉隅。進非紹介。受命于地。乃冀于不凋。獲罪乎天。奚取于他禱。但以孤特少助。依違取容。獨木不林。衆怨如府。積爲拱默之罪。上孤振拔之私。往咎深惟。胡顏自處。所賴回霜中宥。涵海蒙禱。廢格典刑。矜憐恩愍。乾坤施德。厚及于謝生。犬馬日長。誓思于補過。收桑榆而可待。摩頂踵以爲期。宿業云初。乃情增悸。

代加大資知相州謝表

臣某言。佐邦無狀。解務云初。併帖華資。峻加茂秩。寵光溢望。愧惜交顏。竊念臣智不周身。材非經國。曩緣亨會。超進仕塗。興于孤生。越致三事。先皇帝獎其狂直。申以保全。擢居震邸之僚。豫識龍顏之表。時惟巨慝。構乃厲階。忘臣以樸忠。閔臣以艱拙。潛坐黨人之議。嗣罹醜地之遷。萬里去邦。朝非謀夕。一身許國。死且猶生。冀其虺毒斷臂而窮。獸噬得人而止。伏遇皇帝陛下。日華升照。天德爲剛。除堯羣凶。纂禹舊服。垂念投荒之窘。亟推修廢之仁。罷解驚羅。洗除痕注。頻更屏守。復拜臺司。而臣壯以懼銷。氣爲憂耗。傷禽墮于虛引。仆木衰于望秋。再奉疇咨。訖無云補。果連他坐。上案彝章。言盈外庭。罰有平典。而陛下止收丞相之印。尙進司寇之曹。始命爲藩。遽令回節。改升祕殿之職。留侍西清之筵。當責推恩。在尤逃悔。悉排公議。曲暢宸慈。斯蓋丕冒好生。清衷念舊。將收後效。特濟餘齡。謹當澡雪煩襟。激昂懦節。昏瞶寢濁。尙能讀夫九丘。病骨已銷。敢自疲于三陌。惟心內誓。有殞爲酬。



代張屯田兖州謝上表

臣某言。昨蒙恩差臣知兖州軍州兼管內勸農事。卽于某月某日到任。訖初達北闕。出領東藩。千里而遙。萬夫爲長。卽宜寬詔。用慰斯民。竊念臣門素地寒。器枵識褊。陶師儒而有漸。苦扞格以無成。逮事先朝。已參予定。親逢下武。繼被采收。有皆短之五能。乏至愚之一得。蒞官未效。滿歲輒遷。比濫使軺。獲提京邑。式瞻周道。慶在隰之有華。祇率漢條。期墾田之可問。雖希盡瘁。寧厭用多。合首汰沙。用懲竊祿。伏蒙皇帝陛下。葦然善養。豁爾兼容。山有疾以務藏。日容光而必照。黜幽未寘。疎渥更優。頒禮上臺。假麾廣魯。伏況量衡所協。近經虞后之巡。壤賦有差。悉載夏家之貢。禪閭在望。儒泗成風。家被復除。人知廉愧。謹當奉揚成訓。昭體至仁。舉燭解琴。冀動咨于典訓。振苗傷錦。敢微罪于官刑。淪髓在茲。析肝何喻。

代轉戶侍充職知廬州謝表

〔案〕陳堯佐字希元。歷官翰林學士。參知政事。明道二年。以戶部侍郎知廬州。

臣某言。伏奉制命。特授臣戶部侍郎充龍圖閣學士知廬州軍州兼管內勸農事者。寵加無狀。願出所涯。渙汗不收。捫心增愧。竊念臣慙煩材品。扞格藝文。早汗署堂。繼持從橐。慶親逢之在旦。託私葢以如天。旣負又乘。宜疏而粹。書思朝簿。絕念夫均勞。計過夜分。未知其寡悔。且復稟生多病。中年早衰。目苦眊昏。氣多輜結。悒悒臂肉。計日減分。種種頭毛。從衰得白。或臥廬請告。或伏枕彌旬。極味死以陳章。願出藩而寬疾。洪惟慘愛。終爾依違。如臣至愚。自卜已審。非不知高門之地。邇帝所之凝嚴。承明之廬。爲仕塗之極壑。

而命奇智困。福過災生。跛倚不足以相儀。忘誤無容而置對。起訖還臥。自取晉臣之嗤。否終弗傾。誰任義爻之咎。罔虞三瀆。頻紊四聰。祈天必從。誓恩不朽。伏蒙皇帝陛下。深仁念舊。大度匿瑕。收電霽威。回春振槁。憫其尸居之氣。察無他惡之賜。更進文昌之貳官。尙領河圖之祕禁。擇其善地。許以再歷。本緣偃息之私。更遂便蕃之數。臣敢不勉修治體。徧諭上仁。循致樂畤。少寬旰昃。至于遵宣尼之慎疾。訪周氏之全醫。冀及平疆。再陪訪逮。出奉會稽之最。非敢告勞。歸成麗正之書。誓無私恨。逢辰論報。沒齒爲期。

代知兗州謝表

臣某言。驟達天咫。祇率星言。趣四牡以載馳。戾萬夫而樹政。大東之奧。剖簡爲榮。竊念臣智本顛蒙。數惟奇隻。早辱縣官之使。遂代上農之耕。曾乏所長。仰裨乃事。支離有素。居延受粟之譏。樸樸而生。久玷能官之詠。連更郡寄。再覲宸嚴。清明會朝。預陪于有著。好醜必上。令盡其所言。復加五品之章。以示百城之寵。洪惟幸會。負絕擬倫。此蓋陛下仁篤好生。惠深藏疾。扶盧直鉶。各盡于有能。益海附山。或取其微益。俾茲慙野。尙玷寵私。矧汶上之名藩。本魯初之奧壤。承平在旦。富庶敦風。臣敢不律乃叢軀。撫茲善俗。中庸厥履。日夜以思。束矢鈞金。體欽哉于庶獄。杏華菖葉。誠勤止于斯民。少寬當戾之勞。上答包荒之賜。

代謝加勳表

臣某言。今日。本州進奏院遞到官誥一通。敕牒一道。蒙恩加臣上騎都尉。餘如故。仍放朝謝者。神壇二

襲肅陳天燎之儀。溫詔十行。誕布王絲之澤。渙汗式均于近署。策勳爰及于具寮。對昊命以知榮。循官箴而憎惕。竊以實行之寵。遠自于周班。疏爵之勳。近從于唐制。皆以增隆分數。徵序國章。慎康服以酬勞。磨寶賢而分職。聿當亭會。必副輿僉。如臣者。尤治無聞。曠僚滋久。超肩牆而展采。貳符守以出藩。徒堅斷斷之心。未洽優優之政。幸屬國家撫重雍之景運。展甚盛之帝容。卽大次以告成。御琨輿而飲至。天闔第賞。允示于推仁。侯服均禱。誤叨于進律。顧光華之曲被。實俯僂以無從。謬玷寵靈。彌喧物議。敢不劬勤職業。率勵典彝。夙夜在公。謹守殫僉之訓。彌縫其闕。免招漢習之譏。

代薛資政謝許住京養疾表

〔案〕薛奎字宿藝。累官參知政事。明道二年十月以疾罷爲資政學士。

臣某言。近以久疾。陳乞外任。伏奉批答。且令在京就醫藥。將治者。臥疾彌年。未請有損。乞藩上奏。冀獲自私。狀危懇以不支。枉溫辭之垂答。深仁下濟。槁質重蘇。竊念臣偶籍嘉亨。入陪承弼。師師之訓。無補官箴。兩兩之符。屢干臺象。緣食浮而取謗。遂福過以延災。肺腑爲疴。踵息交臂。獲解中樞之任。尙叨祕殿之名。特免造朝。以便藏疾。官無三最。亟煩予告之恩。祿乃百廩。居畏無功之責。綿跨燠涼。嘗備苦甘。前愈未臻。後劇還甚。竊謂已疲之馬。難望君軒之前。遂枯之根。決無穢器之望。輒祈近服。庶續殘齡。蓋且不得而去。非非無情于戀主。孤心如隕。危涕自零。陛下大惠不貲。至誠時克。曲矜舊物。昭布大言。慮下國之既遙。乏上池而取效。俾留神縣。庶就嘉醫。屈原之魄九升。招還有漸。魏鑿之病三百。距躍可期。獲延朝菌之餘。誓

畢夕冰之報。

代李副樞生日謝賜羊酒米麪表

〔案〕李路爲樞密副使，在明道二年四月

危心締感，永念于劬勞。多物有容，茂昭于慶賜。夫何庸懜，有玷寵私。竊念臣偶以薄材，累更煩使。人佐本兵之地，亶逢偃節之期。恩有墜而無酬，力不能而將止。聖猷天縱，大度山藏。弗暴所疵，冀收云補。推御人之爲大，記射矢之有初。寵以稻粱，申之醪餼。況臣莛莛在疚，齷齪叨榮。懷顧復以滋深，荷匪頒之尤異。竊同騷客，私有記于庚辰。何幸絳師，上乃知于甲子。惟內捫于肺腑，冀匪懈于仕塗。獲報萬分，無忘九殞。

代鄭公謝生日賜牲餼表

臣某言，伏蒙聖慈，以臣生日，特降詔書，賜臣羊麪者。至仁垂眷，多物分頒。副中詔以申褒，來王人而臨諭。省恩尤渥，被貺滋慚。竊念臣夙以羈縻，造于熙盛。比塵皇揆，參決政樞。仰含天覆之容，未責人言之刺。矧惟生日，自志私懷。不謂上聞，更煩眷記。遽斥醪牽之厚，且沾稻穭之甘。充衍家饗，光華里旅。糾宗示惠，雖感于己孤。續老蒙慈，遂同于再造。此蓋皇帝陛下，待臣隣而有體。崇予錫之載蕃，雖值譴才，亦容異數。追念親懷之遠，仰明聖養之隆。俾艾不誣，歸醕有所。

代集賢相公謝生日賜物表二首

沃若使華，奉將明命。賁然賜品，森照私庭。荷鴻造之顧存，撫煩惊而震忭。竊念臣親逢千載，逮事兩朝。再

辱營求，訖無稱報。聖神天縱，憲度日躋。曷嘗不心惜于開陳之端，汗流于主臣之對。方虞隱職，仰玷代工。迺蒙皇帝陛下俯諒譴材，特恢大度，推邇臣之同體。記生日之有初，橫錫餼醪，紛頒宮箚。佐庖爲具，出乃眷之茂恩，列鼎分滋。結所生之深感，內期中瘳，少答涓埃。

上恩躋等多物，陳庭俾同氣以奉將，實有家之深幸。竊念臣誠微練達，資適會亨。先帝察無他腸，擢充汝弼，功非可記。寵已不貲，屬兼調護之臣，預識徇齊之表。伏蒙皇帝陛下曲憐舊物，再敍上司。曾是慙冥，闕然風采。平章百姓，則罔助堯功。鎮撫四夷，則但循漢法。託于大度，偶及寡尤。敢圖乃聖之仁，垂念所生之旦。斥華紱于內府，分精器于尙方。乘馬權奇，衢鞍熠煜。侑其私慶，續乃衰年。竊比絳人，僅知于甲子。本慚周輔，弗紀于崧高。銜有昊之至慈，啓孤臣之再造。誓于九殞，仰答萬分。

代生日謝賜羊酒米麪等表

臣某言：禮本自生，劬勞之常感。寵加多物，錫予之至慈。荷居所之頒分，動私門之距躍。竊念臣系承單素，仕遭亨嘉，緣樸移忠。因儒懦武，進貳惟幾之地。間聞甚衆之言，舛命自嬰。親闡見背，亟蒙勉詔。還攝攸司，楚臣離散之魂。胡能立事。漢后回容之庇，居不爲瑕。屬震肅之初辰，動沈綿之深嘆。陔蘭隱露，遂無欲報之期。門矢生塵，長結已孤之想。敢謂陛下俯矜餘息，申獎有家。雖當惕景之餘，亦修陳庭之賜。仰緣滋旨，更極摧號。收景西山，還齡司命。不家而食，頓荷于扶衰。有踵可摩，敢忘于陳力。苦言增吶，感膈奚宣。

代參政生日詔書賜牲餼謝表

臣某言。伏蒙聖慈。以臣生日。特降詔書。賜臣羊酒米麪老驛使紆駢。綈封墜眷。旅臻錫品。紛照家庭。銜惠靡貲。捫心知愧。竊念臣叨陪宰政。再賀歲躔。庶務所縈。淺謀不輯。託包荒于天地。未罷賜于丘園。載育在辰。早孤集感。方資緣寵。例推衍恩。華分碩畜。于牧人。沾美醪于酒正。屑體珍潔。導米粢甘。榮所自生。私訂累茵之歎。俾于爾艾。更蒙全領之慈。此蓋伏遇皇帝陛下。道茂養賢。誼深愛禮。忘其愚短。假乃褻優。佐家食以屬厭。闔宗盟而循省。誓勤夙夜。歸報涓分。

# 景文集卷四十一

表

代參政謝賜神武祕略表

〔案〕晁氏讀書志神武祕略十卷係仁宗御撰

臣某等言。今月六日。中使至私第。被聖旨。賜臣等御製神武祕略一部者。睿機研綜。善志裁成。包囊術以無遺。訂祕書之不布。叨恩有請。拜脫爲榮。恭惟皇帝陛下。錫勇自天。上謀靖國。每戒危于忘戰。乃圖備于有文。編覽緹油。悉該輅略。因兵家之四種。彙以名章。欲師律之萬全。授而爲法。並刊繁廣。以便奉行。無何。備位之臣。遽忝發中之賜。竊閱篇部。粗見指歸。乃知畏此簡書。豫制軍行之勝。不學古法。終貽天幸之嗤。聖作惟精。經謀有賴。誓納楹而傳遺。或佔畢以詳求。少探淵微。罔孤褒錫。

代謝進五箴獎諭表

〔案〕宋史馮元傳景祐三年上金華五箴帝示詔褒答元字道宗時爲侍讀學士

臣某言。伏蒙聖慈。以臣所進金華五箴。并遂特賜詔書獎諭者。誓言通諷。竊抒夫危衷。善聽作謀。猥煩夫褒答。荷擇焉于乃聖。赦斐然之所裁。訓獎垂頒。榮悻參處。伏念臣稟生輜蔽。典學迂疎。亨會相偕。仕塗寢廬。早緣估畢之伎。久侍擁經之游。天縱睿姿。日躋茂德。泰山盤鞏。無俟埃壘之增。時雨沛流。安施浸灌之力。委蛇就綴。拱默窮年。珥珥者佩瑤之長。尸官自審。坎坎者河檀之伐。浮祿旣多。因綴講以偃休。偶臨文

而采獲。以爲千慮而得。罔間至愚。百官攸箴。趣無闕政。堯仁率俾。有謗木之求。周道其興。存庭燎之戒。由是旁緣前誼。紬繹費辭。宣之使言。本由善治之及。入告于內。終謝斯猷之宜。迺蒙皇帝陛下。綜成務之閒。察邇言之陋。貸夫淺慮。諒乃朴忠。收爲瑱之寸長。乃均犀璧。枉出緡之慈諭。迺比日星。刻誦載周。孤危知免。誓雖從于九殞。靡忘補于萬分。

代謝起復表

危喘視陰。方濱死所。明恩變禮。俾復近班。荷言綽之惟行。隕涕靡而增感。竊念臣早緣孤技。獲對顯時。姑務易農。非期廛仕。智殫箴領。慮彼己之不濡。力殫簡書。亦食焉而罔避。寢階華劇。特出愛憐。有三釜以逮親。誠一枝而足志。比屬邇臣均逸。宥府缺員。猥蒙不次之恩。超佐惟幾之地。果緣浮祿。延致害盈。鉅痛終天。餘生觸地。慈襟垂軫。賄布游頰。內迫方寸之危。徑露匪莪之請。見星奔舍。蓋有前規。枕塊窮號。願終哀紀。乏便文之營喻。俟微欲之矜從。伏蒙皇帝陛下。斷自睿謨。召還故職。且謂孝存其大。可得而移忠。恩在所私。不容于掩義。本兵有始墨之主。比事無以家之辭。訓勗載敦。厯殘何幸。敢不奉承異數。澡雪至愚。決其已涸之流。煥以重燃之焰。但慮藥鑿稿骨。玷列辟之趨翔。戚戚煩悵。昧洪樞之關決。苟寸長之可詭。庶再造以仰酬。

代謝落起復并加上柱國食邑表



臣某言。祥期甫畢。詔諭垂頒。俾改權恩。並循吉制。屬因變禮之始。仍推懋賞之榮。省循于中。愧報無實。竊念臣出于羈縻。遷是會亨。先皇帝擢之下陳。實在榮伍。謂材可育。寢飾于朱丹。忘駕之驚。毋勤于驅策。協華撫旦。念舊知人。煩使而觀其能。初無可紀。高位以速其謗。未始越思。乘天務之空員。躡皇僚而備任。適以親庭卽世。哀曲纏憂。執戟總筵。奄奄蒿息。亟蒙慈覆。敦敕窮生。興被經之匪殘。責秉樞之密勿。薄言無感。罔獲家事之辭。欲報無追。遂激忠臣之慕。然而荒疚潛消。神明莫還。處可特味其方。彌綸弗亮于采。所賴聖神親事。丞弼克咸。匪汝爲疵。同底于治。今者霜露云易。燧穀載新。偶延濫至之期。永畢禪安之紀。迺伏蒙皇帝陛下。推明至治。惇序彝倫。俾夫誼有以斷而從中。禮不得過而爲僻。託三年之通制。正一切之便文。且軫危襟。久嬰屯象。特遷勳等。仍衍爰封。蔚僵木以重春。駭攢蓬而更肉。蒙天之力。但仰于曲成。揭日所餘。盡期于上報。刻心潛誓。自口奚宣。

代樞密院謝傳宣入伏後午正歸私第表

王人臨泊。天誨垂頒。仰荷推仁。豁如解慍。竊惟宥密之署。關決至繁。蓋有朝夕之虔。非容燥暑之避。而臣等猥叨善任。時奉諏咨。陰漢闔之高明。居然清暑。候羲驪之中爨。罔若探湯。宜徇官箴。仰遵日恪。迺蒙皇帝陛下。闡垂裳之嘉治。申蔭樾之至慈。尙以交會之辰。繇隆爲甚。稽不韋靜事之典。變郭牙晚出之常。俾便私居。特爲優典。君心省事。務敦常簡之風。臣道在勸。是稱矜憐之賜。共期瘁盡。以補涓分。

代謝夏藥表

臣某言。伏蒙聖慈。賜臣某藥者。星使俄臨。天言誕布。靈藥爰頒于上品。微軀曷載于鴻慈。捧受兢榮。罔知裁處。恭惟皇帝陛下。曲回久照。優寵外臣。屬茲清暑之餘。慮鮮攝生之術。無膏丹劑。普及藩方。載加亭育之私。併示便蕃之錫。寘榮懷而增祕。奚疹癘之可虞。誓罄涓埃。上酬眷渥。

代謝衣襖表

冬箭乘辰。裘官著令。疾馳使驛。臨撫塞屯。並頒齊筭之良。均挾吳綿之煖。被躬且吉。束帶有華。伏惟皇帝陛下。至德誕敷。深仁普愛。念官師所以卒歲。恐天下有受其寒。居泰軫窮。當舒慮慘。況淒其戒序。必惻然動心。特以濱塞。亟嚴持兵。鞞露句傳。溫詔絨褚。紋袍爛然。畫鮮煦若。春至矧部。校什長賜各有差。僻壘窮郭。悅而忘苦。振裾交扑。聯襖相趨。和氣暢肢。顧折膠而何畏。大恩壓已。憂稱服以爲難。有可仰酬。不知輕阻。

代昭文爲飛蝗乞罷免第一表

臣聞。變贊陰陽。茂遂萬物。宰相之職也。銷伏災異。劾免三公。朝廷之法也。若夫得士乃昌。始可以捍患。匪人必黜。是之謂應天。應天者不取于浮言。捍患者必挺于成效。敢沿先事。俯瀝危惊。竊念臣材不逮羣。虛非經遠。偶階薄伐。進服寵光。乘時乏人。備位當國。所啓者故事。旣昧奉行。莫急者朝章。未能練達。括囊自

守既犯史官之譏。俾民且迷。庸孤師尹之望。遂乃招致沴氣。挺爲乾災。蝗蝻放紛。菽粟彫罄。郡國所被。千里而遙。原田其咨。何恃不恐。上貽焦勞之念。垂布僭側之音。減膳深思。側身引咎。並走羣望。弗愛斯牲。卓然至誠。宜荷丕應。然而善祥未得。嘉頌弗興。以臣策之。其則不遠。蓋由宰政乏効。愚慮奪明。處可昧于大中。總領乖于時當。下民失職。長吏曠官。便文自營。多瘠罔詔。茲謂不聰之罰。則有介蟲之妖。臣叨相邦。誰任其咎。天監孔邇。人言莫懲。伏望皇帝陛下。責謨明之罔功。暴承弼之無狀。顯效衆異。俾解上司。賜之觴輪。許就私里。然後改求哲父。升備股肱。導迎太和。振除後咎。抑臣又聞。春秋考異曰。蝗者貪擾所生。京房占曰。其救也。舉有道置于位。如臣待罪。向涉再期。奉人不貲。賜予相繼。既見乎貪擾之應矣。若陛下矜照危迫。回命峻良。順時天工。俾父民極。又合乎有道之救矣。如此。則上帝悅豫。崇迓無疆之休。綿宇順穰。普蒙咸一之德。感于旋日。少慰愚衷。得請爲期。所念靡極。

代中書爲飛蝗乞降官第一表

臣某等言。恭聞應天之變。誼不以文。均國之憂。理難賴寵。而況譏蝗雜會。疵瘼滂臻。民殫見糧。野乏青草。任責躬之懼。既無以萬方。稽失政之原。然本之四輔。尙安有悔之地。實愆同德之風。輒祈降階。少塞無狀。竊念臣等器慚過遠。慮匪及幾。誤奉聰謀。進叨弼直。號令風采。不足平章。庶尹奔走先後。無以感會萬幾。一昨沴氣成災。大田奪食。孽螽紛擾。淋澍怨咨。南捷江淮。東薄齊魯。吏雖火馳而重撫。民且狼顧而易遷。

皇帝陛下至仁如傷。睿志先定。發倉氏以調乏。督輸粟之期。募國人之毀家。濟蒙袂之困。分遣詔使。還定力農。聞復走四方之種祠。捨六視之移過。凜然聲治。貫乎有神。又謂修德。莫如身先。于是減帷辟之常舉。動民不取徒善。于是損乃聖之全名。斷自至誠。祇承天意。臣等既微云補。徒用具員。亟昧死以自陳。願黜幽而賜罷。陛下惜邦之體。爲下受愆。悉掩罔功。俾還視事。臣等重念勦危辭位。則淺于納忠。赦罪責成。則銳乎修政。遂相敕厲。期獲靖嘉。然以據廊廟之甚崇。假器名而見視。善祥靡答。威怒未還。尙容容以自安。寧昭昭之垂戒。伏望陛下諒其至懇。責以協恭。許臣四人降官一等。明著燮調之失。俾圖消伏之方。在國典以甚宜。冀人言之少息。然後叶宣綿力。徐叩大猷。計一得之微勞。投萬分之深報。援天于此。得請爲期。

代乞自試表

臣某言。臣聞能銘能賦。古可爲大夫。自銜自媒。士或譏醜行。然則被彌文之化。咸欲露其中。蘇赦大言之尤。姑議程乎豪俊。敢訟茲誼。俯導微衷。竊念臣代系單平。藝能空闊。曩由鄉品。上預計偕。親逢正宁之明。覆實攸司之奏。擢于寒目。列在秀科。禮局補郎。方州從辟。未操使割。舉迷從政之方。不穡而禾。坐費代耕之廩。在寬闡教。惟疾是藏。幸紓萬坐之刑。入會三年之課。斷溝枯木。宜絕齒于犧樽。荒萊特苗。豈望成夫嘉穀。然臣自幼承學。逮長從師。久刻緒風。罔遷異物。自恪勤于簿領。頗廢志于緹紉。至于洮汰舊疑。踐循雅俗。促曲欹轅之末。細辭呻畢之餘。時著于篇。未能自默。譬之采綠。且無襜芻之盈。均乃鳴蛙。奚助官私。

之地。伏遇陛下。順稽古制。駿惠先猷。溢衡石以程書。交公車而受奏。稗家九百。實俟從容之求。書錄千餘。追復文章之盛。鴻徽所鑠。繇宇嚮風。矧惟孤臣。久陶上教。宜進陳于南闕。答厚養于中阿。竊用連章。具存別錄。表求自試。敢邀過聽之私。人不廢言。或埃聖謀之擇。輕塵皇覽。悅集深憂。

代人乞出表

臣聞。物勝于權。則衡爲之殆。馬竭其力。則御速于顛。蓋以器循量而易施。材過求而難勉。是以功名之際。惟髦士可居。疆力之容。匪暮年勝任。將傾危懇。敢援斯言。竊念臣本以丘樊。託于經術。幸逢先烈。超備從官。服上教之彌文。因至愚而取信。出入丹禁。無所建明。履歷蕃宣。蔑聞條教。伏遇皇太后陛下。皇帝陛下。奉承謨訓。過聽空疎。簡服在庭。兼容如地。雖百度之治。咸使預聞。每萬幾之餘。常參勸講。七周成歲。訖乏寸長。惟君知臣。足以驗其無用。惟國有典。不可道于黜幽。且臣自知甚明。內省尤熟。以一介之鄙賤。丁千載之會昌。邑戶餐錢。非祿之不厚。高冠大佩。非位之不崇。同僚皆賢。非志之不合。處奏多可。非言之不從。固當勉服攸箴。謹修爾職。答乃聖之眷遇。爲斯文之寵光。其如犬馬齒衰。桑榆景薄。中年則病奪其壯。晚節則務傷于神。辨色立朝。足居多于跛倚。書思記命。目不辨于馬烏。而臣頃自去秋。願辭近職。上恩不聽。寵渥就加。逮僊俛以及茲。且憊昏而益甚。事皆忘誤。疾愈尪癯。顧四體之已疲。宜一辭而後止。重念臣之鄉籍。世占鄆州。旣託粉榆。薄營產利。不勝首丘之志。願諧剖竹之行。庶及餘年。聊蘇疲瘵。況前朝邢昺。本

貫曹州亦自禁廬得臨鄉部臣今所請似有前規伏望陛下念舊物之不可遺憫孤生之老且至特垂寬詔俾守先廬諒亦大君進退之閑微臣止足之分萬無纖介可貽累于至仁一切便宜尙力思于臥治仰于睿鑒伏俟嚴誅

代人陳情表

臣某言聞父之于子天性也親才而下無能君之于臣善養也進賢而細不肖蓋智昧于物必問乎在室之言矧位浮于人曷追乎爲邦之典所宜知退敢用敷言竊念臣先故芻微謀猷局隘神宗之啓英穀早玷采收眞聖之御寶圖繼膺進拔預聞外廷之議供奉層禁之中申侯之取不疵本緣君愛隨何之儒旣腐寧濟事公會新廟之顯成啟長君之善繼伏遇皇太后陛下寵綏大業慈護羣元參日慎之繁幾迓太平之至治俯矜無狀之吏是爲最舊之臣未忍遐遺更加進越勸華光之講每踐禁規非倚相之能曷裨王度居多三陌以自勉庶幾一得而上酬其如槁質早衰窮年多病舊疴每作請告移旬賴天造之好生俾爾齡于未泯罔許乞其骸骨姑復峻其寵章拱著寢降害盈可畏臣逮茲歲晏愈覺體厄鬢髮雕殘齒牙缺墮每書笏進對則物物忘遺或聞雞夙興則岑岑昏眩膝搖多痺目銜有花習靜有若于尸居強飯不知其肉味常慮先犬馬之一旦玷鵷鷺之多儀孤繡屨之詳延煩霜毫之糾劾儻不知止人其謂何重念臣家本力農世居汶上先疇咸在編戶未移自東帶立朝去里之情彌結且小人懷土樂生之願茲深

迫此桑榆之期。願諧符竹之請。先朝成例。故府可求。伏望皇太后陛下。推憫但之至慈。憫幽憂之舊物。謂少盡其力。則藉彼驅馳。及老無能爲。則終之收恤。特垂開可。俾卽便安。然後治將蕪之田。爲有歸之地。勉茲殘喘。奉乃化條。嵇康之積損成衰。儻諧養療。漢人之不死而活。敢忘糜捐。罄瀝由衷。仰希得請。

又代陳情乞尋醫表

臣某言。臣聞周家作誥。首誠于療官。漢氏著儀。許從夫移病。蓋大君寬疾之念。推至仁善養之風。三最有聞。乃嘉其與告。千石共治。詎可以尸居。迫此尫殘。所宜引避。竊臣材姿么譚。系代羈單。乏典學以名家。濫諸生而充賦。親逢乙覽。遂中丙科。屬家難之繼鍾。逮龍躔之十改。一命尉乎南部。載調掾于比軍。當三輔浩穰之間。森乎條教。會萬乘齋居之隙。多所平反。棘署尸丞。芝函僭賞。升佐鳳岐之郡政。俄假邛蜀之使符。舉畏亂繩。坐虞傷錦。伏值陛下丕承在旦。渙號均禧。擢于六尚之班。隸乃一王之局。孰何貸責。寢舍如地之容。極陋揆能。終費坎壇之刺。庇于大度。及此再麾。當江漢之方思。得土風之樂甚。修方有序。論報無階。而臣屬自去秋。寢嬰末疾。臥閣相繼。握臂鮮惊。髮從白而得衰。目視朱而成碧。步趨興齊。跛之謂。沈痼均漳竄之嗟。乃至束帶愆儀。班春闕政。事委丞掾之決。食失匕筯之滋。每廢忘于臨文。專幽憂而玩日。曠僚已甚。竊祿何顏。誠以臣荷寵至深。謝生無所。身非稱服。自速子臧之災。少不如人。矧追田光之老。豈可抱枯株之叢質。叨細札以長人。竊飽于太倉之糧。據貴于東方之騎。汲黯之病甫力。臥治莫能。楚客之魂。

久迷些招徒爾。輒圖藏密。以便養痾。欲乞聖慈。特聽解所居官。許令尋訪醫治。伏望陛下曲成在念。憫愛凝懷。俾得謝于中年。且博詢于高手。益調名劑。丐永餘齡。仰恃生符。苟焄蒿之未泯。誓于死節。罄精力而仰酬。係戀無階。震惶惟極。

代鄭公乞外任第一表

臣某言。臣聞名不可倖取。過實則浮。人有以自知。弗能斯止。矧萬幾密勿。任切于論思。一介娑婆。力窮于補報。是用去位。以儆瘵官。仰恃至仁。罄敷危訴。伏念臣學非全古。才不逮人。擢始布衣。寢陪書筭。贊爲名命之重。入階局籍之華。曾是拙艱。惜于進取。謀而三省。常自勵于爾躬。猶不一爲。卒見憐于乃聖。俾參天下之務。因預幄中之籌。試可罔功。輸年賜免。已璽之駕。奚望于再駢。方汲之淵。何圖于續綆。召從外守。復貳繁機。適屬邊保休寧。調輶衰息。民獲其所。物以有年。列辟交修。日新于所治。當寧親事。天健而愈強。因容具臣。久忝高位。俄使樞管。遂正宰司。光榮所崇。位遇彌峻。竊惟三公之責。吏事安可冒居。聖主而督。恐臣不容無悔。重以福基素狹。年事日侵。外則公言可虞。內則宿疾時動。而又一歲之內。二息云亡。悲憂自中。氣志俱耗。安可尙聯衰職之貴。分揖槐庭之嚴。身不自聊。政于何有。且鳥飛者不宜上。在易有凶。鵲懸而未嘗敗。反物爲悵。前鑒旣爾。來者謂何。伏望皇帝陛下。念稟數之早奇。憫匪材之難強。許停重柄。回授近藩。愛小器于未盈。免其必覆。乞稿骸于將殞。俾遂更生。君臣之間。終始爲託。投誠無隱。須允爲期。



## 第二表

臣某言。近露奏封。願還重柄。苦言無感。善聽愈高。戰悸交中。啓處無次。臣孤生下品。惜學淺謀。雖陶文治之風。本無富貴之願。容聰過聽。顯任益躋。參大政者五年。總中樞者逾歲。緣榮掩咎。恃乃聖之兼容。持短裨長。驗不能于已事。更階人乏。遂正宰司。臣亦知步蹇無以亟趨。器盈難乎多受。棟而弗幹。招可撓之譏。斷且未工。無不傷之累。尚依至治。勉服攸箴。然而官責未加。私釁先及。悲憂耗氣。疾疢乘衰。卻顧百骸。內外之攻非一。仰惟三接。論思之任奈何。況古有避賢。非容冒處。仕而知止。乃保克終。伏望皇帝陛下。察臣尸祿之已多。矜臣稟祐之初薄。許停右弼。退守列藩。陰紓不衷之災。顯避無庸之謗。況盛爲衰倚。譬朝暮之必然。弔與賀偕。殆門閭之相望。願紆慈惻。垂亮孤危。儻速解于衡機。是得全于要領。委誠傾訴。須命開俞。

## 代石資政乞外任表

臣某言。臣聞力止所勝。是爲知分。任適其量。迺無敗材。故上揆能以命官。下揣己而受職。有一異此。誰不致顛。臣之危悚。正本茲喻。伏念臣稟生單薄。賦性慙冥。曩在弱巾。卽沿仕牒。太宗以舊臣之子。籍寘朝闈。眞宗以斯文之興。引內儒閣。間膺煩試。因用稍遷。寧無吝瑕。訖賜全獲。伏遇皇帝陛下。繼承在旦。清明有初。因料羣材。并收無似。蓋十年不調。方冀罷歸。而三世爲郎。猥爲上識。寢司書命。冒入禁林。式金之度無

裨不稼之困。奚取越陪機政。噴竦興言。果以非人。亟蒙賜免。尙緣踟躕之念。入塵華殿之資。臣之親逢。未見前比。然臣薄祜有底。頽齡早侵。今春以來。臥疾尤數。久蒙假息。虧奉朝參。臣非不知寵難冒居。病當劾去。上還印綬。退伏丘樊。奈何聚族苦多。治生無素。先產耗竭。私帑單虛。惟卻俸泉。以辦家事。是以節爲貧奪。愚恃眷忘。冒行鐘漏之餘。苟圖溝壑之濟。洪私再造。有忝無酬。茲者羸懷所乘。趨走尤梗。屏居難久。公議必興。欲望聖慈。許臣知潁州一任。爲歸老之漸。旣緣近輔。且便泝流。稍入足以亢宗。僻左可以藏疾。儻蒙從欲。是獲更生。臣又聞出者以作守爲優。處者以入朝爲重。事非相戾。趣各有殊。上哲詳觀。物情非遠。如臣者。結髮從政五十餘年。未始一朝輕去雙闕。今焉昧死。非曰孤恩。直以迫知分之言。畏敗材之辱。秋葩離榦。理有適然。老馬辭軒。願非獲已。伏望陛下。好仁本于觀德。善始念乎愛終。開錫俞音。就成素願。委之臥理。敢自比于昔人。勉乃奉揚。尙力希于循吏。抱誠至寤。赴訴不文。忉日懇懷。仰頌垂可。

代陳州章相公乞致仕第一表

臣聞器有所極。強之者必顛。志有所安。違之者將敗。是故智士不窮量以邀受。仁君無拂願以責功。內顧危惊。敢援茲喻。伏以臣姿力鷲下。術略迂疎。蒙幸中人之材。待罪宰相之府。寵與時進。負隨日深。謀謨弗良。彫紊相踵。羌夏有未纓之醜。關陝多無聊之人。萑盜跳梁。篋酋煽結。杼軸罄于編戶。杆皮蠹于遠方。上貽焦勞。外謹謗誚。咎不臣執。罪將孰歸。比者。洊瀝肝膈。願乞骸骨。羣蒙不職之竄。以贖安用之辜。皇帝陛

下包納荒遐。親諭戒敕。須訖郊丘之享。乃許印綬之還。裊亮所加。諄慈兼至。臣此時外迫大誼。中忘至恩。敢優游以自安。輒惶恐而視事。然而智慮淺局。年鬢頽侵。短臂屈長袖之前。疲足困新羈之左。覩然尸位。倏又彌年。所賴陛下以百姓爲心。天下爲度。捨末爭而納戎帳之款。招滯積以撫遼左之和。克展上儀。遂布鴻慶。永惟橫目之庶。方就覆盂之安。臣之及茲。可謂天幸。過此不止。其如罪何。雖大度之見容。在輿議之難遏。抑又聞當退而進者。悔必及。宜黜而用者。傷必多。高位乃身殃之媒。厚祿爲衆怨之舍。借令臣冒厥明戒。苟畱上司。玷廊廟之儀型。被史家之貶戮。死有餘咎。仁弗忍爲。伏望察如丹之誠。憐指景之暮。遂容納政。早獲省私。亦不必窮喋喋之言。乃垂許可。惜齷齪之謹。妨用俊良。虔冀曰俞。誓無但已。

代南郊乞姪男恩澤表

臣某言。伏覩七月五日御札。以今年十一月十七日有事于南郊者。協華之盛。茂擁于神祺。拜貺之行。親紆于詔蹕。始戒嚴而措事。先誕告以揚庭。發號崇朝。均驩有截。臣某伏惟陛下。嗣聲遙駿。覃化淵泉。躬夏后之勤邦。體商家之恤祀。會先玉帛之至。樂包天地之和。紺席圓壇。講令芳于百物。寒門治谷。交盼璽于萬靈。善制允諧。先庚惟謹。極承平之巨麗。究卓越之盛容。頑艷飲和。宵翹企澤。而臣濫名郎舍。繫籍京臺。延望玉關之門。阻從甘泉之簿。尚傾危款。仰託至仁。竊念臣有親姪某。早習義方。粗親章句。有年及室。無祿代耕。而臣終鮮銜悲。亢宗靡託。惜其孤苦。勵以進修。不勝猶子之情。願遂起家之志。庶及禮成之旦。許

推世及之恩。伏望陛下。閔臣以服事四朝。哀臣以年踰七十。獨茲童孺。久漏恩私。儻參一命之餘。俾紹闔門之慶。則臣少盡其力。知有報于敝帷。死且猶生。誓無忘于結草。

# 景文集卷四十二

## 議

明堂路寢議（案）歷代名臣奏議初議禮諸奏皆係皇祐二年爲侍讀學士時上

凡明堂路寢其名雖異其制一也。昔神農氏祀于明堂。有其蓋而無四方。至黃帝謂明堂爲合宮。唐虞謂明堂爲五府。夏后氏謂明堂爲世室。商人謂路寢爲重屋。周人謂五府爲明堂。黃帝合宮。義猶唐虞五府。府聚也。言五帝之神聚祭乎此。夏后氏名世室者。取世世不毀也。商人名重屋者。商于虞夏稍文。加以重檐四阿之制。故取名焉。周人爲明堂者。以其明政教之法常于此堂也。天子布十二月政令。每月就其時之堂而聽朔焉。若閏月則闔門左扉而施其政。故于文王在門爲閏。又曰在國之陽。居離之地。有明義焉。故謂之明堂。夏之世室深蓋八丈四尺。廣十丈五尺。匠人職所謂廣四脩一也。基高一尺。夏氏堂上五室。以法五行。木室處東北。火室處東南。金室處西南。水室處西北。每室深丈八尺。廣二丈一尺。土室處中。深二丈四尺。廣二丈八尺。然五室居堂之上。深六丈。廣七丈。又匠人職所謂堂上五室。三四步。四三尺也。有九階。三面二階。南面三階。法陽數也。五室有四戶八牕。戶法四時。牕法八節。一堂者。法地載五行云。商人曰重屋者。正寢也。正寢則路寢也。其制堂深五丈六尺。廣七丈二尺。堂上亦爲五室。室方一丈六尺。基高

三尺。重屋四阿。四阿者。霑也。周人明堂如寢廟法。九尺爲筵。東西九筵。南北七筵。基高一筵。上亦五室。室深廣二筵。或曰。宮蓋方三百步。在近郊三十里。或曰。七里之郊。鄭康成曰。此三者。或舉宗廟。或舉正寢。或舉明堂。互言之。明其同制也。漢馬宮曰。夏后世室。室顯于堂。故命以室。商人重屋。屋顯于堂。故命以屋。周人明堂。大于夏室。故命以堂。夏氏益其堂之廣百四十四尺。周人明堂以爲兩序間。大夏氏七十二尺云。漢武帝始以公玉帶所上黃帝時明堂圖作之。汶上其圖中一殿。四面無壁。以茅蓋。通水。水環室垣。爲複道。上有樓。從西南入。名曰崑崙。帝始祠太一。五帝于上坐。至後漢光武帝。又營明堂。上圓下方。八牕四闥。九室十二坐。室四戶。凡三十六。八牕。凡七十二。沿周制也。晉議營明堂。裴頠曰。尊祖配天。其義明著。廟宇之制。禮據未分。宜可直爲一殿。以崇嚴父之祀。其餘雜碎。一皆除之。由是宋齊以後。咸率茲禮。故宋作明堂。止爲大殿十二楹。無古戶牖。但文飾雕畫而已。梁仍宋制。以中六楹安六天帝。坐悉南向。五人帝位阼階上。堂後爲小殿五楹。爲五佐室焉。唐明皇帝始以東都乾元殿爲明堂。參用周法。開元二十年。以行享。祖臣按。明堂。天子布政之所。因得祀上帝者。蓋以地非褻近。可以交饗人神歟。至三代彌文。故制爲戶牖。有所法象。所以尊大而神明之也。要之在講禮事神。布揚法度而已。後之王者。所以班大政。朝羣臣。何嘗無其所哉。其謂之宣室。謂之太極。皆明堂比也。沿革稱謂。有不同耳。而諸儒限局聞見。抱殘冊。爭空言。據已是之槩見。抗必信之實論。以爲一事一物。不如古制。則爲非禮。推尊上古。殆不可及。然殊不知聖人便。

世制宜。興至治。安天下。通靈心。雖無明堂。猶無損于有道。嫌于行禮者也。今之大慶。則古之路寢。卽明堂也。以之奉天。以之布政。何不可耶。國朝以來。非朝會齋宿。未嘗臨御。故其棟宇閎邃。廷唐華敞。與燕寢自不相連。固非常幸褻近者也。今有請卽爲明堂。于禮便甚。

### 五室議

明堂所以有五室者何。尙書帝命。驗曰。帝者承天。立五府。赤曰文祖。黃曰神升。白曰顯紀。黑曰無矩。蒼曰靈府。鄭康成曰。五府與周明堂同。自夏以來。五室之制不改。周家以木室在東北。象木生于寅。火室在東南。象火生于巳。金室在西南。象金起于申。水室在西北。象水起于亥。土室居中者。象土總御五行。寄治四方。不專一隅之義也。其名。木室曰青陽。火室曰明堂。土室曰太室。金室曰總章。水室曰元堂。青陽者。言春之色。與陽之氣。明堂者。夏爲朱明。是其體之明也。太室者。太。大也。土功最大。餘行比之爲小。以其含容廣大也。總章者。總。法也。章。明也。至秋。萬物已成。光明潔鮮云。元堂者。元。黑也。冬殺爲陰。故取黑義。秦更制九室。其法不傳。後漢之營明堂。遂改周制。張衡所謂複廟重屋。八達九房者。或曰。九室十二坐。以象九州。十二月。朱營明堂。止爲十二大屋。無戶牖之制。齊從王儉議。更複五室。梁武帝欲有述作。乃下制與羣大臣議曰。堂准大戴禮。九室。八牖。三十六戶。以茅蓋。屋上圓下方。鄭康成據援神契。亦曰上圓下方。曰八牖四闕。明堂之義。本是祭五帝神。而九室之數。未見其禮。若以五堂而言。雖當五帝之數。而南則背。叶光紀。面

北則背赤燁怒東面西面又亦如之于事殊未可安且明堂之祭議五帝則是總議在郊之祭五帝則別宗祀所配復應有室若專配一室則是義非配五若皆配五則便成五位以理而言明堂本無有室朱异以爲月令天子居明堂左个右个聽朔之禮旣在明堂今若無室則于義誠闕制曰若如鄭義聽朔必在明堂于此則人神混淆恭嚴之道有廢春秋云个居二大國之間此言明堂左右个者謂所祀五帝堂之南又有小室亦號明堂分爲三處聽朔旣三處則有左右之義在營域之內明堂之外則有个名故曰明堂左右个也以此而言聽朔之處自在五帝堂之外神旣有別理無相干議遂不能定天監十二年虞囿建言周禮明堂九尺之筵以爲高下脩廣之數堂崇一筵故階高九尺漢家制度猶遵此禮故張衡引度堂以筵者也鄭康成以廟寢三制旣同俱應以九尺爲度制曰可于是毀宋太極殿以其材構明堂十二楹基准太廟以中央六楹安六座悉南向由東第一青帝第二赤帝第三黃帝第四白帝第五黑帝配帝總配享五帝在阼階東上西向大殿後又爲小殿五楹以爲五佐室焉後周採三輔黃圖欲建九室不能成隋牛里仁建言三代相沿咸有損益至于五室確然不變夫室以祭天天實有五若立九室四廡所用布政視朔自依其辰鄭司農謂十二月分在十二月青陽等左右之位不云居室康成亦言每月于其時之堂而聽政焉禮圖畫个皆在堂偏是以須爲五室唐高宗與羣臣雜議以五室爲宜故設昊天上帝于太室中央南向配帝于東南西向青帝于木室西向赤帝于火室北向黃帝于太室南戶之西北向白帝



于金室。東向。黑帝于水室。南向。其太昊、炎帝、軒轅少昊、高辛之坐。各于五方帝之左。內向。差退。勾芒、祝融、后土、蓐收、元冥。坐于明堂廷中。各于其方。俱內向。故國朝從唐制。儀存通禮。臣按。古謂明堂爲五府。似五室之制。權輿于此。上世圖籍淪闕。不得摺紳先生所能道者。又皆大較而言。不能纖細推處。故夏周止云大享帝明堂。不言帝別一室。後世諸儒。推而合之。分主五行。遂設神位。有其興之。莫可廢也。然漢制本爲九室。薛綜曰。堂後有九室。所以異周制云。若然。室在堂後。不爲享帝之位明矣。故向背之間。梁武致疑。筵几之度。遠而難質。今有司請以大慶殿卽爲明堂。倣古宜今。最爲合禮。周禮書曰。清廟明堂與路寢同制。此其驗也。其五室權以幔幄爲之。以明六天五帝蒞位于禮無嫌。

### 規蔡邕明堂議

蔡邕曰。明堂者。天子太廟。所以崇禮其祖。以配上帝者也。夏曰世室。商曰重屋。周曰明堂。東爲青陽。南爲明堂。西爲總章。北爲元堂。中爲太室。易曰。離也者。明也。南方之卦也。聖人南面而聽天下。嚮明而治。人君之位。莫正于此。故雖有五名。而主以明堂也。其正中焉。皆曰太廟。謹承天隨時之令。昭令德宗祀之禮。明前功百辟之勞。起尊老敬長之義。顯教幼誨稚之學。朝諸侯。選造士于其中。以度制。生者乘其能而至。死者論其功而祭。故爲大教之宮。而四學具焉。譬如北辰。居其所而衆星拱之。萬象翼之。教之有所由生。作之有所自來。明一統也。故言明堂事之大。義之深也。取其宗祀之清貌。則曰清廟。取其正室之貌。則曰太

廟取其尊崇則曰太室取其堂則曰明堂取其四門之學則曰太學取其四面周水圓如璧則曰辟雍異名而同事其實一也春秋因魯取宋之紆賂則顯之太廟以明聖王建清廟明堂之義經曰取郕大鼎于宋納于太廟非禮也君人者將昭德塞違故昭令德以示子孫是以清廟茅屋昭其儉也夫德儉而有度升降有數文物以紀之聲明以發之臨照百官百官于是戒懼而不敢易紀律所以大明教也周清廟魯太廟皆明堂也魯禘祀周公于太廟明堂猶周宗祀文王于清廟明堂也禮記檀弓曰王齋禘于清廟明堂也孝經曰宗祀文王于明堂禮記明堂位曰太廟天子明堂又曰成王幼弱周公踐天子位以治天下朝諸侯于明堂制禮作樂頒度量而天下大服成王以周公爲有勳勞于天下命魯公世世禘祀周公于太廟以天子禮樂升歌清廟下管象舞所以異魯于天下取周清廟之歌歌于魯太廟明堂魯之廟猶周清廟也皆所以昭文王周公之德以示子孫者也易傳大初篇曰天子旦入東學晝入南學暮入西學夕入北學在中央曰太學天子之所自學也禮記保傅篇曰帝入東學上親而貴仁入西學上賢而貴德入南學上齒而貴信入北學上貴而尊爵入太學承師而問道與易傳同魏文帝孝經傳曰太學者中學明堂之位也禮記古大明堂之禮曰膳夫是相禮日中出南闕見九侯門子日昃出西闕視五國之事日闕出北闕視帝節爾雅曰宮中之門謂之闕王居明堂之禮又別陰陽門南門稱門西門稱闕故周官有門闕之學師氏教以三德守王門保氏教以六藝守王闕然則師氏居東門南門保氏居西門北門也知掌

教國子與易傳保傅王居明堂之禮參相發明爲四學焉文王世子篇曰凡大合樂必遂養老天子至乃命有司行事興秩節祭先師先聖焉始之養也適東序釋奠于先老遂設三老位焉春夏學干戈秋冬學羽籥皆于東序凡祭與養老乞言合語之禮皆小樂正詔之于東序又曰大司成論說在東序然則詔學皆在東序東序東之堂也學者詔焉故稱太學仲冬之月令祀百辟卿士之有德于民者禮記太學志曰禮士大夫學于聖人善人祭于明堂其無位者祭于太學禮記昭穆篇曰祀先賢于四學所以教諸侯之德也卽以顯行國禮之處也太學明堂之東序也皆在明堂辟雍之內月令記曰明堂者所以明天氣統萬物明堂上通于天象曰辰故下十二宮象曰辰也水環四周言王者動作法天地廣德及四海方此水也名曰辟雍王制曰天子出征執有罪反釋奠于學以訊馘告樂記曰武王伐商爲俘馘于京太室詩魯頌云矯矯虎臣在泮獻馘京太室辟雍之中明堂太室也與諸侯泮宮俱獻馘焉卽王制所謂以訊馘告者也禮記曰祀乎明堂所以教諸侯之孝也食三老五更于太學所以教諸侯之弟也孝經曰孝悌之至通于神明光于四海無所不通詩云自西自東自南自北無思不服言行孝者則曰明堂行悌者則曰太學故孝經合爲一義而稱鎬京之詩以明之凡此皆明堂太室辟雍太學通合之義也其制度數合有所法堂方百四十四尺坤之策也屋圓徑二百一十六尺乾之策也太廟明堂方三十六丈通天屋徑九丈陰陽九六之變其圓蓋方載六九之道也八闌以象八卦九室以象九州十二宮以應辰三十六戶七十

二牖以四戶八牖乘九室之數也。戶皆外設而不閉。示天下不藏也。通天屋高八十一尺。黃鍾九九之實也。二十八柱列于四方。七宿之象也。堂高三丈。亦應三統。四鄉五色。以象五行。外廣二十四丈。應一歲二十四氣。四周以水。象四海。王者之大禮也。晉袁准著論非之曰。明堂太廟太學三者。事義不同。各有所施。而論者合爲一體。取詩書放逸之文。經典相似之語。推而同之。其失遠矣。夫宗廟之中。人所致敬。幽隱清靜。鬼神所居。而使衆學處焉。饗射其中。人鬼慢黷。死生交錯。囚俘截耳。創痍流血。以干鬼神。非其理也。又茅茨采椽。至質之物。建日月。乘玉輅。以處其中。非其類也。禮記先儒云。明堂四面。東西八丈。南北六丈。與七廟非一體也。夫宗廟鬼神所居。祭天而于人鬼之室。非其處也。王者五門。宗廟在一門之內。若射在于廟。而張三侯。又辟雍在內。非宗廟之中所能容也。周人立三代之學。非立三代宗廟者也。周養老于東膠。非三老也。文王世子。養老乞言于東序。又皆于學也。靈臺以望氣。清廟以訓儉。既非一體。安有宗廟之中而以之燕射戲謔乎。明堂在國之陽。而宗廟在左。又宗廟不應在外也。齊宣王問孟子曰。可毀明堂乎。若明堂是廟。豈容有此問哉。諸儒言明堂。各未有證。蔡邕等遂言異名同實。方之北辰居所。取其處中不移。旁運三光。非是一物。而備其體以悟人意耳。臣按蔡邕爲漢大儒。當時去聖人未遠。然而以明堂清廟辟雍靈臺合爲一物。不知何據。寧其博見異藝。有所述乎。將以獨識取高當世也。自孔子歿。諸儒蜂奮。或言魯禮。或論周制。或道夏商家自爲書。決不相通。又緯讖詭異。附經造說。誼無足據。而邕信其所疑。是愚謂

不可行而言。是誣合誣與愚。豈必有一焉。宜爲後人之嗤詆也。故魏晉而下。豈說不復施行。

### 上帝五帝議

鄭康成以上天之神凡六。昊天者。天皇帝。五帝者。太微五帝。王肅曰。昊天惟一神。以五帝爲次神。而諸儒附鄭者多。故據而爲說云。凡合祭五帝。一歲有二祀。龍見之月。祭于南郊。謂之大零。一也。九月。大饗于明堂。宗祀文王以配二也。祭明堂者。諸儒之言不同。或說周家祭五天帝皆明堂中。以五人帝及文王配。五官神坐庭中。以武王配。號曰祖宗。禮所謂祖文王而宗武王者也。施設神位。準五行相向以爲法。威仰在卯。西面。燁怒在午。北面。樞紐在未。北面。招拒在酉。東面。汁光紀在子。南面。太皞。炎帝。黃帝。少皞。高辛。各在其位。少退。勾芒。祝融。后土。蓐收。元冥。皆在人帝下。少後。文王坐太皞之南。位如主人。武王少退。或曰。合祭之日。五精之帝皆西面。其牲則天帝各一犢。合用十牲。文王之牲用太牢。以詩我將篇曰。我將我享。維羊維牛。文王武王而用太牢者。以五人帝各配一天。爲之主。足爲外神依止。則文王汎配五帝矣。以不專配。則所用牲得從盡物之享云。漢武帝祠太一五帝于明堂。上坐。牲以太牢。禮畢。燎堂下。晉武帝初議明堂。羣臣曰。五帝卽天也。王氣時異。故殊其號。雖名有五。其實一。明堂南郊宜除五帝坐。五郊改五精之號。皆同稱昊天上帝。各設一位而已。詔可。時韓陽建言。古建明堂。咸秩五帝。無祭一天者。帝下詔曰。往者衆議。除明堂五帝位。攷之禮文。不正。其復之。摯虞議。以爲漢魏故事。明堂祀五帝之神。新禮。五帝卽上帝。上

帝卽天也。明堂除五帝之位。惟祭上帝。按仲尼稱郊祀后稷以配天。宗祀文王于明堂以配上帝。周禮。天旅上帝。祀地旅四望。四望非地。則上帝非天。斷可識矣。郊丘之祀。掃地而祭。牲用繭栗。器用陶匏。事反其始。故配以遠祖。明堂之祭。備物以薦。三牲並陳。籩豆成列。禮同人理。故配以近考。郊堂兆位。居然異體。牲牢品物。質文殊趣。且祖考同配。非謂尊嚴之美。三日再祀。非謂不黷之義。其非一神。亦足明矣。昔在上古。生爲明王。沒配五行。故太昊配木。神農配火。少昊配金。高辛配水。黃帝配土。此五帝者。配天之神。同兆之于四郊。報之于明堂。祀天大裘而冕。祀五帝亦如之。或以爲五精之帝。佐天育物者也。前代相因。莫之或廢。前韓陽上書。宜如舊祀五帝。詔已施用。請改定新禮。從之。唐禮部尙書許敬宗議。祠令新禮。竝用鄭氏六天之說。圓丘祀昊天上帝。大郊祀太微感帝。明堂祠太微五帝。按鄭氏惟據讖緯以說六天。皆謂星象。而昊天上帝不屬穹蒼。其注月令。周官。以昊天上帝爲北辰耀魄寶。注孝經。明堂爲太微五帝。按易。日月麗于天。百穀草木麗于地。在天成象。在地成形。足明辰象非天。草木非地。毛萇傳曰。元氣浩大。則稱昊天。遠視蒼蒼。則稱蒼天。此則蒼昊爲體。不入星例。且天地各一。是曰兩儀。天尙無二。帝焉有六。是以王肅羣儒咸非其義。起居舍人王仲丘。又以貞觀禮。季秋祀五帝明堂。顯慶禮。祀昊天上帝于明堂。准孝經說。先以爲天是感精之帝。上帝卽太微五帝。且上帝之號。本屬昊天。周禮。王將旅上帝。張毘案。設皇邸。祀五帝。張大次小次。由此言之。上帝之于五帝。自有差等。不可混而爲一。鄭注孝經。上帝者。天之別名。神無二。

主故異其處以避后稷。孔安國曰：帝亦天也。然則禋享上帝，有合經義，而五方皆祀行之已久。請二禮竝行，以成月令大享帝之義。詔可。自是不改國朝因之。臣按諸儒之說，上帝及五帝紛然不一。王肅以爲上帝卽昊天。鄭康成謂昊天爲皇大帝，五帝爲太微五帝。王鄭二說旣顯，學者爭爲執辨。雖天子亦不能果定其文，然臣以爲就經言之，仲尼之意，儻可見也。孝經曰：孝莫大于嚴父，嚴父莫大于配天。又曰：郊祀后稷以配天。宗祀文王于明堂以配上帝。周頌我將篇曰：祀文王也。我將我享，維羊維牛，惟天其右之。伊嘏文王，旣右享之。孝經言配天而後言上帝，詩當言帝右而云天右，是天爲上帝，上帝爲天，互文以見義也。天之所以爲五帝者，先儒之議多矣。近大儒孫奭建言：天雖一神，以其至尊，故有多名，亦猶人君稱皇、王、后、辟、天王、天子、皇帝，縣官臣民曰陛下。史臣曰：上服用曰乘輿，出入曰車駕，各隨德義而稱，亦以至尊故也。以天帝之神，迭王五時，故聖人制禮謂之五帝，非五帝各一神也。竊謂先儒不怪詩傳天有五名，而獨怪帝有五號，奭又以歲九祭皆主于天，至日圓丘正月祈穀，五時迎氣，孟夏雩，季秋享，凡九，惟至日其禮最大，故稱曰昊天上帝。昊天者，以體稱上帝者，以德兼舉，禮大故也。其餘則否。至于大雩祈百穀之雨，大享報百穀之成，以五帝者，有生成之功，祈報之禮，闕一不可。雖止一神，竝陳五位，不知神之于彼乎，于此乎，輒言如是其得也，然而欲去昊天上帝一位，止設五帝，臣以爲禮有未然。號昊天者，以其元氣魁然，乘五行王氣，普臨萬物，因時顯功，人強以名，故春曰青帝，夏曰赤帝，猶春爲蒼天，冬爲上天耳。唐以來，二家

之說兼行。故今享禮有六帝位。雖然。甞許于彼于此而求之矣。何獨是五而非六乎。故兼存之。則示聖人尊天奉神。不敢有所裁臆云。



# 景文集卷四十三

## 議

### 配帝議

祭法有虞氏禘黃帝而郊嚳。祖顓頊而宗堯。夏后氏亦禘黃帝而郊鯀。祖顓頊而宗禹。商人禘嚳而郊冥。祖契而宗湯。周人禘嚳而郊稷。祖文王而宗武王。鄭氏曰。禘。郊。祖宗。謂祭昊天于圓丘曰禘。祭上帝于南郊曰郊。祭五帝五神于明堂曰祖宗。祖宗通言耳。虞氏以上尙德。禘郊祖宗。配用有德者。自夏以下。稍用其姓代先後之次。郊祭一帝。而明堂祭五帝。小德配寡。大德配衆。禮之殺也。諸儒據鄭此說。由是推而廣之。以明文武有俱配之義。臣按孝經曰。孝莫大于嚴父。嚴父莫大于配天。則周公其人也。昔者周公郊祀后稷以配天。宗祀文王于明堂以配上帝。然則孔子著經以美周公者。則自周以上。未有能以父之尊而進配上帝者也。惟周公能之。則自商及虞。安得祖而宗之之說耶。禮記多出秦漢諸儒之家。鄭卽據而爲解。以違孔經。以未之思耳。崔靈恩曰。五帝皆坐明堂中。以五人帝及文王配之。五神坐廷中。以武王配之。或非之曰。不然。五官之神。生爲上公。死爲貴神。其生也。帝王之饗。皆預升堂。今爲貴神。獨坐于下。屈武王之尊。下坐同之。義爲不允。當謂合祭五帝明堂。惟有一祭。五帝及神俱坐堂上。以文武二祖汎配五帝及

神歟。以文王配祭五帝。則謂之祖。以武王配祭五神。則謂之宗。二王同時竝配。故祭法所謂祖文王宗武王也。祖始也。宗尊也。名祭爲尊。且始者。明一祭之中有二義焉。以始而言。爲合祭五帝于大雩之時。爲百穀祈歲功。始求之義也。以尊而言。季秋之月。得其成功。尊而祀之。以報其德。明二王配祭。既有此義。故分爲二名。鄭康成所謂祖宗通言者。謂稱祖不得無尊嚴之心。言尊不得無始求之理。而孝經及詩但云祀文王于明堂。不云武王者。祖宗之祭其體同。故舉一足以明。不待兩見云。宗祀文王于明堂。文王當言祖。而云宗者。亦通武王之義。漢武帝初祠太一。五帝于明堂上坐。以高皇帝對之。至明帝。乃以光武配五帝。在青帝之南少退。西面。自是歷章安而下。不敢輒易。齊明帝有事明堂。有請以武帝配。謝曇濟曰。按法。祫郊祖宗。竝列嚴祠。鄭氏注義。亦據兼饗。宜祖宗兩配。文武雙祀。左僕射王晏曰。若用鄭說。祖宗通言。則生有功德。沒垂尊稱。歷代配帝。何止于二。今盛薦上帝。允屬武考。百代不改。其文廟乎。詔可。唐太宗始以高祖配享明堂。高宗又奉太宗配祀。有司遂以高祖配五天帝。太宗配五人帝。太尉長孫無忌建言。永徽二年七月詔書。奉太宗以遵嚴配。時高祖當遷。禮司乃以太宗降配五人帝。雖同在明堂。不得對越天帝。非明詔奉親之意。謹按。孝莫大于嚴父。嚴父莫大于配天。伏尋詔意。義在于此。又尋漢魏晉宋歷代之禮。無父子同配之義。惟祭法稱周人禘饗而郊稷。祖文王而宗武王。鄭康成謂祖宗者。通言祭五帝五神于明堂也。尋鄭之意。乃以祖宗合爲一祭。又以文武共在明堂。連祫配祀。良爲巨謬。故王肅曰。古者祖有功而

宗有德。祖宗自是不毀之名。非謂配食者也。審如鄭義。則經當言祖祀文王。不得言宗祀也。又曰。武王配勾芒之類。是謂五神。位在堂下。天子降位。失君鉞矣。故春秋傳。禘郊祖宗報五者。國之典祀也。知各一事。非祖宗合祀于明堂矣。南齊蕭氏。以武明昆季竝于明堂配食。事乃不經。不足爲法。武德時。以元帝配于明堂。兼配感帝。至貞觀初。緣情革禮。奉高祖配明堂。延世祖專配感帝。有遞遷之典。高祖請配吳天上帝。太宗請配明堂五帝。從之。垂拱元年。有司議嚴配之禮。孔元義曰。孝莫大于嚴父。嚴父莫大于配天。明配之尊大者。昊天是也。請奉太宗高宗配天上帝于圓丘。高祖配感帝于南郊。昔宗祀文王于明堂。文王當云祖。而云宗者。通武王之義。請太宗高宗配祭于明堂。沈伯儀曰。有虞禘黃帝而郊。魯祖顓頊而宗。夏后亦禘黃帝而郊。鯀祖顓頊而宗。禹商人禘。魯而郊。冥祖契而宗。湯周人禘。魯而郊。稷祖文王而宗。武王伏。尋嚴配之文。于此最備。德禮之序。莫善于周。禘。魯郊。稷。不聞于二主。明堂宗祀。周兼于兩配。以文王武王父子殊別。文王爲父。上主五帝。武王對父。下配五神。昔者周公宗祀文王于明堂。以配上帝。不言嚴武王以配天。則武王雖在明堂。理未齊于配祭。既稱宗祀。義獨主于尊嚴。雖同兩祭。終爲一主。故孝經緯曰。后稷爲天地主。文王爲五帝宗也。必若一神而兩祭。爲是則五祭十祠。薦獻頻繁。實虧于數。此則神無二主之道。禮崇一配之義。竊尋貞觀永徽。共尊專配。顯慶之後。始創兼尊。必以順古。宜從周法。高祖請配圓丘方澤。太宗請配南北郊。高宗配五天帝。鳳閣舍人元萬頃等議。按見行禮。昊天上帝等祠五所。咸奉高

祖太宗兼配。今議者引祭法、周頌、孝經之文。雖近古之詞。殊失聖旨。伏據見行禮。高祖太宗今既配五祠。當仍舊無改。高宗功烈無著。豈祠配有別。請亦配五祠。于是郊丘諸禮。以三帝同配。明皇帝開元十一年。罷之。國朝太祖受命。以宣祖配享明堂。太宗始奉太祖配。俄又以宣祖配焉。眞宗復奉太祖。聖上嗣位。奉眞宗配天。以正孝經嚴父之義。臣按鄭氏以文武二王皆配明堂。其言非是。據孝經止言嚴父配天。周公其人也。今以周公言之。則武王非父。以成王言之。則文王爲祖。二理較然。不待議而判矣。齊唐以數帝皆配。于經義寧不戾耶。

雜制議

王用四圭有邸者。何。象物之生也。以璧爲邸者。取所生之周匝也。雩祀用之以祈百物。大享用之以報成功。示無不用徧之義。天帝用犢者。何。貴誠也。配享之牲。與天帝同。以配尊而食。不敢異其牲也。幣各倣其器之色者。何。青圭禮東方。則青犢青幣。赤璋禮南方。則赤犢赤幣。黃琮禮黃帝。則黃犢黃幣。白琥禮西方。則白犢白幣。元璜禮北方。則黑犢黑幣。酒次鄒終醑。禮畢。太祝取俎上黍肉。當御前以授。請如郊儀。止用清酒。一獻。五帝本天。不可求之于地。二郊無黍肉禮。請竝停。陳制。祀以太牢。粢盛六飯。餼羹果蔬備薦焉。隋不建明堂。祭于雩壇。牲用十二。皇帝太尉司農行三獻禮于青帝及太祖。餘帝以有司助奠。五官一獻而已。古饗明堂無定月。惟月令有季秋大饗帝。鄭氏曰。徧祭五帝也。漢明帝祠正月。章帝祠二月。魏明帝

祠正月。晉武帝祠三月。宋孝武祠正月。齊高帝祠七月。至唐止用季秋。國朝沿唐制。用日。據禮大饗不問卜。前制用辛日。取自新潔之義。東晉孝武帝正月上辛祀昊天。次辛祀后土。後辛祀明堂。制寓祭于圓丘壇。國朝因之。唐貞元元年。詔五方配帝。上古哲王。論善計功。則朕德不類。統天御極。則朕位攸同。而今祀文。稱臣以祭。無益誠恪。有黷等威。宜自今不復稱臣。以正禮典。按郊丘全用祀天之義。天下之物。無以稱德。故尙質。明堂參有饗親之孝。于入理差近。故尙文。歷代沿革。或有義趣。然禮不可過。亦不可不及。要在稱情立制。以據大中。觀開寶新典。協古今之宜。兼文質之常。可行可遵。皆會聖辰。不其偉歟。

### 升歌議

按虞書。后夔曰。憂擊鳴球。搏拊琴瑟以詠。祖考來格。孔安國傳曰。憂擊。祝敵也。球。玉磬也。搏拊。韋爲之。此舜廟堂之樂。又曰。下管鼗鼓。合止祝敵。傳曰。堂下樂也。上下合止。樂各有祝敵。故鳴球鐘簫各自互見。此則舜時堂上之樂。差多于今矣。禮家之言曰。歌者在。上。匏竹在下。貴人聲也。而不及其他。詩稱鼓鐘欽欽。鼓瑟鼓琴。笙聲同音。鄭司農謂堂上堂下之鐘磬與八音克諧也。儀禮。荷瑟升堂。笙入立于階間。亦其事也。自唐以來。凡祭天地。則樂縣在壇下。鐘磬從歌者位于壇上。壎及匏竹立于壇下。宮縣之上。宗廟則縣在庭。鐘磬從歌者位于堂。匏竹等立于堂下。殿庭朝會如之。又據樂令。節鼓歌工琴瑟箏筑在上。鐘磬笙和簫篪塤在下。國朝大抵多遵唐舊法。惟登歌之制。若朝會。則編鐘在殿上之右。節鼓者一。歌者四。阮咸

九絃琴七絃琴箏瑟筑者各二分列鐘磬之次。土與匏竹三屬皆二工立于殿下。圓丘則悉坐壇上。宗廟會同之儀咸有司攝事。樂悉升階之儀初無著令。乃諸工習常自爲差降耳。凡諸祭祀用樂者天子不親行。止用登歌。今列二圖以志前後沿革云。

蠻夷利害議

〔案〕歷代名臣奏議此首題作劉子係祁知成德軍時上。

右臣竊聞用兵者不幸敵之亂而欲已之不可亂。不畏彼之侵而患所以來其侵也。今聞契丹興端造隙。欲敗和誓。外倚虛驕。搖脅近邊。不顧曲直。惟利是視。是謂貪兵。兵貪者亂。此可乘而取之。然陛下無良將。邊郵之臣類皆才下。又甲冑不完。密弓弩不射遠。行無馱幕。出無營壘。馬乏精突。士習饑惰。外不能扞患。內能爲患。此陛下未有可冀敵之不能亂也。邕溪之蠻最脆弱者。今乃離去巢窟。略地千里。弄兵安行。無一能拒。蚩飛蠅營。擊而不散。此官濫吏庸招其所以侵也。事弊及此。不振而張之。不可謂謀。謀之不臧。使得遺禍。不可謂國。臣伏見陛下諸臣急則念治。緩則偷安。天下無事時。見利害之小者。則鄙之以爲不足事。及大利害則憚曰。安可卒行。又曰。據今日之安。亦未及于危。小者鄙之。大者難之。遠者蔑之。于是天下之事日損。一日歲耗一歲。經制不立。紀綱頽陵。陛下盛德四海晏然。然無法而治。不可以恃。今幸二邊小警。朝廷焦意寒心。此而獻謀。人意必向。臣請先舉二方言之。今河北旣分部署等路。各有屬州。是唐諸節度兵也。然而未有都統以節進退。臣請因建大帥以一之。使部分各得其人。則金鼓旗幟。卒伍號令。便當

一稟于其帥。緩鎧磨兵。益養馬。閱師而討之。講求法度。朝廷密詔。以敵入某處。以某部署軍當之。某路以師援。某所以糧濟。咨大帥而聽命焉。擊首尾應。擊尾首應。犄角屈伸。包裹彌縫。明立賞罰。閩外之務。不從中制。此所謂不可亂也。不亂。則陛下可用而勝彼之亂也。嶺南外區。瘴癘薰蒸。北方戍人。夏秋往者。九死一在。多發兵則糧乏。少發則事不集。急責功則蠻獠遁逃不肯出。緩則復來擾人。是宜有以制之也。今聞發北方兵。踰萬人。已成嶺外。下濕上蒸。病死必多。料羣蠻勢不久屯。擊之必散。臣謂不如選一二健將。歲纔留北兵五千人。分屯要害處。得善吏十數人。完治諸州。募土人爲鄉軍。復其租調。視州大小戶多少爲之數。統以部伍。教以進退。習以彼所長技。與相追逐。率百人給北兵三十。以勁弩利兵佐之。冬春則使深入擾其居。夏秋則使謹守防其略。彼雖能誘納中國亡命。要之食盡必出鹵掠。若其來也。一大斬獲。則終身瘡矣。我威已立。然後可議招來。與之盟則固。許之臣則久。遠期五年。近止三年。南方無事矣。臣竊恐有司苟且。復仍舊弊。多留客兵。自取死亡。又不先以威而務招懷。不爲遠圖。而求近效。故雖盟必違。雖臣必叛。夫前日之失。已不可追。自今之利。便當審料。恐諸將功成之後。議者秦然。遂便因循授吏。鹵莽設防。不爲陛下議長久計。雖一賊死而百賊生。故臣曰。彼侵不足畏。患所以來其侵也。臣愚陋不識禁忌。惟陛下裁赦用之。

### 馳道議

臣伏見宣德門前御道南至天漢橋。久來設棧柵。禁止行人。頒立條制。許近上臣僚于道上行馬。近觀御史臺禮院重更定奪。應出節者爲近上臣僚。竊謂宣德門比周之外朝。朱雀門是唐之皇城。中有御路。號天子馳道。凡在臣庶。不合得行。漢制。皇太子尙不敢擅絕馳道。蓋尊君卑臣。上下有體故也。今朝廷制度。簡于漢唐。京都御路。止此一處。臣欲今自宣德門至朱雀門外朝之地。皇城之內。表其中街。以爲馳道。應臣庶車馬。竝禁往來。惟隨從乘輿。不在禁限。議者或謂契丹人使已曾許馳道行馬。難于改作。臣謂天子制度。臣子共當崇戴。彼之使臣。亦陛下之臣也。設令彼有疑問。則令主客者具以實對。質之事體。無所妨礙。乞再下有司詳定。取進止。

論養牧馬使臣議

臣伏見提舉監牧使臣。例各愚悞。不任職事。其于牧養之法。全不經心。國家因循太平之政。又無的確賞罰。遂使日朘月削。凌夷至此。臣欲乞河北諸監。每監判官一員。竝兩制以上奉京朝官有材幹者。以三年爲一任。每監使臣十人。人主馬千匹。竝一歲中定分數登耗。爲賞罰之法。任滿許升降差遣。〔案〕此似非全篇。但無別

本可校姑附于此

劾李孝友議〔案〕歷代名臣奏議此首題作劄子

劍州司理參軍李孝友。陳首冒用鄉貫。因此及第。法寺斷從自首原免。許行改正。臣伏詳李孝友身爲儒



士業習詩書。宜于大義。略有知識。今試冒貫三代。明認虔州錄事參軍李徹爲父。改易名字。苟求薦論。按春秋時。婦人尙知曰父一而已。而孝友見利忘義。首亂大倫。棄已死之親。事假立之父。親疎交亂。昭穆外移。且不恭其親而恭他人。謂之悖禮。況自犯名教。略無畏慚。此而可容。誰不可赦。伏望朝廷據其狂悖。投竄遠方。使終身不得更玷仕籍。敦誠儉薄。各識義方。取進止。

贈尙書右僕射孫奭諡議

(案)此篇永樂大典佚載。今依文翰類選錄。宋文鑑作孫奭宣公諡議。

博士宋祁議曰。僕射清明莊重。體柔而用健。揚和吸精。儲爲英華。在布衣韋帶。有一沈不器之韻。緩袂彈冠。賓于王門。是時宋興四十餘歲。天子上文嚮學。開太平之原。薪樞髦士。充布臺閣。而未有卓然以儒名家。僕射由經生。博貫前載。乃以詩之多識。書之致遠。易之肆而隱。春秋之婉而微。禮之肅雍。樂之易良。參勸講授。爲薦紳倡始。執據聖道。洮汰羣疑。斗杓所建。遂成寒暑。珎璜所觸。自然宮徵。歷官上庠。居爲時宗。旣而籍內禁閑。踐諫省駁曹之任。入進其說。出詭其辭。批鱗罔憚。職衰無闕。在塞王臣。匪躬在說。命朝夕納誨。惟僕射舉之。愛莫助之。屬今上濬明厥初。物色舊老。實膺丹書之問。進對華光之塗。用階告猷。式克躋聖。桓榮稽古。寬中眇論。惟僕射有之。是以似之。及宸幄歸道。安車稅駕。天文襲餞。士倫嗟悵。俾耆而艾。以歿元身。大君廢朝。行路相弔。賻布所須。一出長府。密章加等。昭飾下泉。信乎令終之高顯。大雅之明哲矣。謹按諡法。體和居中。善問周達。曰宣。僕射處躬彌沖。在醜忘競。不居物累。不爲盜增。其讓如范宣。其快

如子孺能體和矣。內治家事。外施邦政。接士無貌言。祝神無媿辭。協用通介。時其進退。能居中矣。行成束修。節貫華皓。終以碩望。顯升師臣。其所薦士。皆足經哲秉猷。敷賁皇極。遙遠時舉。常如不及。以年得謝。享考終之福。生平素守。鮮如晨葩。信善問矣。建白紬次百餘篇。傳經見義。質聖行遠。藏于冊府。副在家楹。推明則董仲舒。博洽則劉向。其周達矣。節惠知行。請諡曰宣。謹議。

論

論文帝不能用頗牧

昔漢文帝嘗歎廉頗李牧之爲人也。曰。吾獨不得頗牧時爲吾將。何憂匈奴哉。馮唐曰。陛下雖得廉頗李牧。弗能用也。于時匈奴新入。朝那比地。殺略尤衆。邊郡之士。蕭然苦兵。民屋云騷。帝意彌屬。卒復問曰。公何知吾不能用也。唐因具道古之遺將也。闡以內天子制之。闡以外將軍制之。號令賞罰。不從中復。今陛下罰太重。賞太輕。雖得頗牧。無能爲矣。帝說其言。以爲中尉。原夫漢承孤秦之敝。民厭六國之亂。戰力既屈。衣食未植。是時漢興四十餘歲矣。瘡傷甫起。歌吟僅息。遭冒頓之強運。席平城之衰氣。厚幣以懷之。和親以導之。彼猶不悛。乘我未備。虔劉我民庶。蕩搖我邊疆。中國之民。發軔相繼。而文帝鑒竊良將。諮諏羣議。思得大扞民患。一當單于者。斯正聖人銳志求治之秋也。夫不憂患則慮不深。不激切則言不行。故馮唐之言頗牧之事。將以感悟明主。奮發至治也。夫以文帝之聖。寬而御下。德而化人。紬繹優游。忠利潛恒。

天下之吏責成于理。高祖舊臣相繼而相。而唐豈不知之。是使頗牧生乎其時。我知其必能用矣。夫用之不盡其效。則如不用。思之不求其人。則如勿思。周書曰。未見聖若不克見聖。既見聖亦不克由聖。此唐所以激勵其治。底慎其終。成其求人之心。靡其將怠之志。幾微之兆。見乎此矣。使死者可作。豈不念唐言而委任責成哉。凡人臣高論萬乘之前。激昂當世之事。稱古之成。必使負乎若不及。誠今之亂。必使瞿然如將至。然後可以動容于主上。成績于百辟。若唐之論。夫豈遠哉。噫。雖然。唐之論兵。惜其不極于王道而終入于戰國也。若稱古之道。將既盡矣。吾謂當遂推召伯方虎之佐。以成其義。不當近取頗牧。媿合苟勝之計也。且文帝繼暴亂之末。敦清淨之風。較其資材。不下成康。豈宜復以縱橫之說。引喻之哉。且文帝之世。單于五犯中國。帝但遣將出兵。盡境而退。此可知帝之不樂窮追極戰。挈禍傷民也。故揖將軍于細柳。屈己以尊亞夫。歎李廣之能戰。惜其不遇高祖。仁者不務戰勝而好自修也。明矣。馮公之言。得無微過乎。

### 蕭望之論

子嘗論望之之爲人也。始以經術論議有餘。引是非。爭大體。據位持重。有直質而無流心。身爲儒宗。臨大節而不可奪。信乎中興之名臣已。然或取名而忌其上。慕古而不適事。顯己而果于用辯。好任而罔能擇人。斯亦賢人有所蔽乎。春秋不舍許世子之罪。世子賢者也。君子因可責而責之。所以昭判淑慝。使後之亂臣賊子。無所旁緣以竄其惡。曉然知功罪之不得相掩。故予竊用論云。當地節之初。西羌內叛。軍興穀

貴。裁足相給。于是張敞建言。願令諸有臯非盜受財殺人及犯法不得赦者。皆得入穀贖罪。務實邊郡。賢于橫斂。可謂上術矣。望之乃援堯桀義利之分。天漢盜賊之驗。引古自高。沮其實效。苟以謀不出己。快私任情。韓延壽治東郡。爲天下最。代望之爲左馮翊。恩信周徧。二十四縣莫復以辭訟自言者。名出望之遠甚。然望之因令御史按問延壽在東郡時放散官錢千餘萬。延壽亦校望之放廩餼錢百萬。于時望之得君。由是上不直延壽。窮竟所考。望之卒以延壽修治車甲三百萬。僭上不道。以棄市論。此則取名忌上之一驗。馮奉世奉使西域。于時莎車殺漢使。劫諸國。謀降匈奴。奉世策其雄張。則西域非復漢有。遂節諭諸國。發兵誅之。威震西海。大宛請服。可謂敵王所愾。厭難未萌矣。宣帝美其功。議欲封之。望之建白。以矯制違命。不可爲法。開後奉使者爲國生事。奉世用是不得封。耿壽昌奏言。糴穀三輔。省關東漕卒三萬人。令邊郡皆築倉貯穀。賤則增價而糴。貴則抑價而糶。權節其用。名曰常平。望之知其得幸于上。不能無少望。復言壽昌習于商工分銖之事。未足任宜。且如故。上不聽。民果便之。此慕古不適事之二驗。張敞旣爲京兆。朝廷大議。自處便宜。公卿皆服。與望之于定國相善。元帝卽位。或言敞名臣。宜傳輔太子。望之以敞任治煩亂。非師傅器。迺罷之。知丙吉長者。上所素重。因劾言三公非人。評裁隱切。亦已過甚。此則顯已用辯之三驗。孝元之世。望之數宴見。陳治亂。惡石顯之傾仄。而漏其幾。誤鄭朋之譎誑。而納其說。終之君臣間隙。爲便嬖堅合而軋之。此則好任不擇人之四驗。孟堅稱望之堂堂折而不撓。近古社稷臣也。斯可尙矣。

若前之四驗，寧所望于蕭傅乎？君子是以知材全之難。



# 景文集卷四十四

論

和戎論

客問主人曰。蓋聞王者受命。繼天作主。盡日月之所照。以爲臣妾。極霜露之所墜。以通文軫。內撫諸夏。外威四夷。蕩無能名。尊無與上。負固不賓者。抗大順以肅之。恃險與馬者。誓六師以夷之。上以取侔貲。比崇之勳。下以定深根固蒂之業。此堯舜所以稽古。商周所以播憲。九伐所以作。六籍所以書。萬古之同風。百王之不易者也。今大宋奄承駿命。光有中區。敷至仁高。蹈乎帝堯。篤洪伐茂。對于天下。自武祖立極。文宗拓統。承五代之殘殺。屬九州之屠裂。辱王僞帝。分據州郡。恃險多游魂之敵。當陽有和戎之義。綈帛之錫。委屬于金微。歲時之饋。相望于絕漠。寬以愿法。若奉驕子。意者殆非聖皇所以操絕瑞垂無窮之意乎。夫率鳥舉之民。不足當一縣之衆。驅烏合之卒。不能抗八陣之師。而執事者不以此時長驅而深入。係弱而壘老。踞冒頓之落。蹇翁侯之旗。方且規規然詢樂成之近議。舍慮始之遠謀。識一勞之淺害。忘久逸之深利。此賈生所以請屬國。終軍所以求長纓也。蒙竊惑焉。主人喟然嘆曰。客所謂知其一。未知其二。見其內。不識其外也。夫持夕死之類。與論春秋之變。則極矣。從尺澤之鯢。而謀江海之深。則乖矣。僕常惡聞其說。

今爲子揚摧而陳之。夫天生五材，民之經用，守在四夷。君之善教，兵者凶器，可戢而不可玩。爭者末節，可遏而不可召。故善師謂之不陳。至仁所以無敵。子貢足食，以去兵爲先。楚王還師，以禁暴爲德。先諸夏而後夷狄，限于中外也。修文德以來遠人，賤夫爭戰也。故聖王能禦大災，能捍大患，而後舉行一不義，殺一不辜，而不爲討其君，除其害，救之塗炭，毆之仁壽而已。故七旬所以格，後予所以怨。三舍所以降，一戎所以定。此聖人所以用兵略也。夫匈奴之患，爲日久矣。虞書有猾夏之誡，禹謨著卽敍之戒，以高宗之明，不能息鬼方三年之役，以宣王之盛，不能休太原六月之師。高祖困白登之圍，孝文警灞上之戍，斯皆當鴻鈞之代，困侵略之暴，驚邊抗士，烽舉而燧燔，飛芻輓粟，雲屬而波委，以至甘辭重幣，命奉春而和親，撫髀擊節，思李牧以爲將。此皆窮極發憤，計深慮遠之謀也。是知可以德服，不可以兵碎。在乎嚴備，不在乎深入。且匈奴無城郭之守，廩庾之備，羶肉酪漿，以適口，革筍木薦，以便體，桀鷺相尙，遷徙無常，厲折膠之威，騁新羈之足，蒙犯無輟，疥之疾，勝敗無讓，救之援，輕齋而入，則師不宿飽，轉粟而前，則重不及事，得其地，幽陰慘殺，不可以播殖，罄其財，荷旃被毳，不足以祭祀，并其衆，被髮左衽，不足以使令，靡敝中國，以奉絕域，非惻隱之仁，血戰不解，勝敗慘半，非定功之武。且秦皇藉破縱之勢，舉推鋒之師，東轉琅瑯之粟，北收河南之地，及其末也，天下愁怨，民不聊生。于是乎始有陳勝之亂，漢武據數世之憤，矯前代之議，築朔方以毀左臂，通烏孫以裂右肩，及其末也，府庫殫竭，貳師外叛。于是乎始罷輪臺之卒，由是觀之，力非不足。



士非不勇。其勢然也。則李斯謂之非完計。嚴尤稱其得下策。不其然乎。是故聖人知亟戰之勞民。則懷之以恩信。慮內侵之爲患。則嚴之以亭障。來朝也。不徵其玉帛。請和也。厚結以盟誓。入而寇也。禦之以整。引而去也。縱而不追。春秋賜以奇贏之帛。關市通其貿遷之貨。汎惠以撫之。畜力以待之。然後可得而制也。今子乃欲舍盛際而諱爽德。徼小利而階宿禍。亦已謬矣。且往年單于有南牧之患。上聖奮濯征之旅。輕車突騎。布于寶城。擒俘斬馘。獻于行在。旬日之內。戎醜大殲。當此之時。六嬴之君。賢王之師。震怖相視。鞮譯狎至。咸願移珍款塞。息軍旅之事。放牛牧馬。結兄弟之國。尺奏旣入。諸帥會議。多以爲敵衆旣壞。歸路且絕。內無抄略之獲。外無求應之援。屢挫其銳。罔有鬪心。計者不若陽許之和。且懈其志。然後陰詔環衛之士。勒兵堅壁。與之上下。又命沿邊之郡。乘高守險。掠其輜重。命一上將。躬率銳旅。以當其中。如是。則不數日。單于之頭可致于麾下矣。惟天子聖仁。昭曠罷退衆說。以爲獲而殺之。非勝殘之道。遷而處之。非順物之性。搏之于敗。非勇。許之而背。非信。一動而四失附。何爲而可哉。乃大賚其衆。厚答其意。漏以吞舟之網。結以刑馬之盟。自是以來。朔野之民。息肩于奔命。龍廷之蓋。厥角而請朝。由斯以談。則來而拒之。成湯之甚武也。拒而勝之。文王之三捷也。服而舍之。唐堯之至仁也。撫而安之。宣帝之重威也。按六經而校德。歷列辟而論功。聲名之盛。殊尤之伐。未有若斯者也。傳曰。王者之師。有征無戰。語曰。如有王者。必世而後仁。宋德可謂當之矣。客曰。有若是言也。且小雅稱普天之下。莫非王土。春秋美九州共貫。六合同風。爰自

晉室召戎。伊川被髮。種落旣盛。干戈日尋。侵伐我邊疆。憑凌我畿甸。是使先王桑梓爲甌脫之區。雖石將兵亂可封之俗。至乎皇朝誕命。疏俗來廷。而匈奴尙竊據幽都。首鼠北鄙。先帝念遺黎之困。承戰國之餘。姑務救甯。未遑弔伐。洎我后撫期御歷。柔遠懷邇。財力雄富。朝廷淑清。躬行節儉。垂二十載。禁錢流出。倉箱紅腐。介士拳勇。神兵犀利。坐籌之相。決勝于內。注意之將。分命諸外。加以天休地寶。霧集山委。古人有言曰。日中必昃。操刀必割。是宜挾符瑞之感。并賢能之力。大啓士宇。以成先志。圖上方略。克復內地。斯必取之術也。又何疑焉。主人曰。甚矣。客之不知言也。夫公劉避狄人而去國。周德不以衰。孝元棄朱崖而罷戍。漢道于是顯。貪外虛內。君房之格言。費十愛一。子雲之深誠。況乎蕪絕之域。瀉鹵之地。黠敵之所處。共工之所流。得其域不以益廣。失其衆不足損威。且政莫大于安民。禍莫大于從欲。今不忍涓涓之憤。而毆元元之衆。擠之幽冥之域。以攘尺寸之地。嫁從欲之禍。墮安民之政。歲月不拔。師人流離。則禍可勝道哉。故曰。仁言不如仁聲之深也。地利不如人和之愈也。古者不居之地。不牧之民。靡與受朔。安足煩中國。是以侯甸要荒。限遠邇之宜。義應貪驕。戒兵革之舉。過此以往。聖人所不諭矣。方今宏大之化。安若覆盂。密清之風。高邁垂策。今子乃欲秉翻然之成議。角無用之虛文。勞四海之富。復一州之地。亦以褊矣。且子徒惜匈奴之獲我幣帛。曾不知懷其部落。使遠徙漠北。徒見匈奴之竊我土地。曾不知羈其王侯。使自致闕下。謂符瑞之可恃。曾不知安必慮危。謂將帥之可用。曾不知師曲爲老。言未卒。客降服而謝曰。鄙人黔淺。

泥于聞見，牽膠言而踰侈，歷執古之醇聽，而今而後，乃知聖人之事業，非匹夫之所知也。

禦戎論并表 【案】歷代名臣奏議係至和二年進

臣于皇祐四年秋七月，待罪成德軍。五年二月，改定武軍，皆兼本路安撫部署兩司。此河北極選賢士大夫日夜所望立功名者也。臣某誠恐誠懼，頓首頓首。臣不肖，少服儒業，幸得秉筆代天子制令，奉職弗稱，遂用外遷。迺蒙皇帝陛下，擢自疎冗，付以劇使，俾專一面，護諸將，責重體雄，日靡遑寧，出入三年，無毫髮之報，竊以持兵擁甲，野戰乘城，皆非臣所能，勉加體力，早衰年向六十，謀不逮遠，識不先事，姑奉陛下經武之略，赧然汗發于背。然所至詢疆場事，所以制敵大略，口見耳聞，參以一得，輒次爲禦戎論七篇，其語不文，以便事也。弗泥于古，從權宜也。直取今日利害，決爲可行也。不足示後時異則，計有所不用也。伏以中書樞密院皆忠力大臣，謀謨閎深，奉承聖算，明燭萬里，物無遁情。臣今所上，乃廊廟殘計，策牘棄語，猶敢冒昧上陳者，欲明邊臣思不出職，亦上佐朝聽，芻蕘千慮之冀也。干冒宸覽，臣無任愧羞戰慄之至。其論謹附表投獻以聞。臣某誠恐誠懼，頓首頓首，謹言。

篇之一

客問臣：子爲陛下守中山，直契丹西鄙，天下精兵處，敵敢引弓南面射，最先薄戰。自先帝咸平以來，常以重將臨統，子今出入三年，頗知敵情僞乎？臣應曰：太守本諸生，朝廷不知其愚，使護諸屯，未嘗履軍陷陣，

又無橫縱之辨。王霸之術。烏能論敵乎。雖然。傳曰。知彼知己。太守誠不肖。粗能舉其凡。客曰。願子無讓。請以今事言之。竊聞西夏與契丹解仇申約。復爲甥舅。信乎。臣曰。契丹使一介叩朝廷。言夏人臣順事。驅馬羊納有司。果信矣。然則兩敵合而無隙。彼將連衡以擾二邊。奈何。臣曰。合則有之。隙未平也。契丹地大。兵衆而猥。羌地狹。卒寡而精。以大臨狹。則弗獲已而合。以精抗猥。何敢安受其臣哉。且契丹與夏戰。一不勝。殺卒二萬餘。北主僅自脫。築威武金蕭等城。跨河而守者五年矣。訖無尺寸功。是北窮于侵而西倦守矣。故卑辭厚幣。以休兵甲之勞。思弭隙而連和。以軋吾境。抄刼係纍。各飽其私。安得不合。臣曰。不然。如客所謂。茲易與耳。國家歲棄金帛五十萬與契丹。以五萬與西夏。彼有背盟爲不臣者。我幣五十萬固不出境。若陰以十萬許羌人。赦其罪以攜之。彼必與中國合。還兵而抗契丹。契丹失西援。且不敢前。我又陰許還契丹三十萬與之乎。則二敵之仇結不解矣。朝廷安視其禍。以虛饋操二國重輕。何所患哉。客曰。羌人自元昊以來。勢始張。國褊而兵寡。雖與合。恐不足爲重輕。對曰。不然。元昊善用兵。其左右皆賢。故數亂西陲。未嘗少衄焉。雖挾勝而不敢不來臣。知事大之體也。旣父子戕死。而諸酋扶婦嫗抱嬰雛。南面而朝人。惕息相與守舊。君法無違德。南抗中國。東支契丹。養馬按兵自如。四鄰不敢欺。國中有年。無疾疫死亡。意者天假之幸。是且將與。烏得不爲重輕哉。

客曰。子謂契丹與古孰強。臣曰。耶律一姓王二百年。今其衰也歟。客曰。彼兼奚黑水高麗達靺新羅數十國。薄海而東南。包燕薊肥腴之地。與中國爭長六十年。今又得西夏而臣之。何云衰耶。臣曰。客詫其表。不責其裏。請爲客道所聞。敵主懦庸。其弟悍剽好戰。本許傳國。故盡以奚契丹兵屬之。敵主有子且長。更爲王。以燕薊華人屬之。然其弟當右蕃卑漢。數請犯中國。子常佐漢。願與中國和。故敵主依違不能有所決。華人之輔政者皆附主與子。蕃長之當國者附其弟。是一軀裂爲二支。禍難待時作耳。有如君長一日病死。其弟卽位。愛子能相下爲君臣乎。能爲君臣無疑忌乎。華蕃大臣能合而不限乎。內不能定。必大誅殺。安得不亂。亂必有黨。黨必爭。爭未必有能國也。彼高麗達靺等苦爲契丹屬久矣。誅求無時。調發無度。一旦契丹亂。彼將蝟毛而奮。自王其國。且何恃而強。又和戎以來。北人習見朝廷袍笏之美。百官之富。肴果饌醪炙淪甘珍。衣服器彝薰澤光鮮。皆委氈毳。厭血食。慕爲華風。時時道詩書語。竊問儒者禮樂等事。爭貨執綃織縵之麗。橙茗辛馥之奇。以相夸尙。此賈誼所謂五餌壞其耳目腹心者也。客曰。五餌等語。班固詆以爲疎。子何據之。臣曰。然。誼于治體深。故其言奧。其事久而效。固俗儒也。見誼不爲文帝用。便以誼爲空言。固則陋矣。且自古夷狄所以強中國者。隨水草。無常居。耐霜雪。以鞍馬爲家。此其勝邑居城郭也。射狐鹿兔麋。飲其血。服其皮。脯肉而糗之。此其勝耕斂困廩也。喜相羣。怒相殺。殺人者取償而止。有罪卽誅。凡召發。傳一箭。哄然皆集。此其勝文檄簿領也。生能挽弓傳矢。帶刀劍。懦妻弱子皆習熟。此其勝營伍教。

督也不事制度文物。君臣竝肱而踞。情一而志通。此其勝禮文親疎嫌疑等差也。今則不然。反殺而強仁。反戰而崇和。棄腥糲甘饔熟美衣食。酣聲樂。所以勝中國之具者。一切喪矣。是耳目腹心壞而不完。徒操虛強以搖中國。太守知其無能爲也。

篇之三

客曰。景德時。契丹數侵河北。我諸將謀必敗。戰必走。何耶。敵旣負勝。由是鼓而前。破五六城。突魏觸瀆。躡踞無所畏。子識所以然乎。臣曰。識之。中國失虎北之隘。自幽而南。地如衽席然。何承矩始畜陂障。建屯田。塹而畦之。限敵馳突。然東不盡海。西薄常山。數百里輒止。外無所阨。故敵常埽穹廬而來。厲壯馬。走平地。以大衆加中國。其時也。馬適肥。士適飽。人人貪抄刼之利。氣適無前。我諸將常迎其銳薄之。又以寡抗衆。故彼常勝。吾常負。失所以制敵之術也。曰。然則何不待其氣弱而後戰。臣曰。得已而然哉。夫大將在外。必有貴臣監軍。貴臣見敵至。不課彼已強弱。不待便利。促其將使鬪。鬪而敗。閉壘不敢出矣。然後敵以數萬騎。綴廣信安肅二軍。嬰保州。則定武僅能自守。敵精兵獵瀛冀。犯深趙。瀛冀自不支。其穿西山而出者。繞鎮右行。鎮兵雖急戰。不能禁其入。由是蹂躪洛而睥睨澶魏矣。客曰。策安出。臣曰。在擇將以圖外事。付之。夫任一則權不分。故外不見脅于中。上不見狃于下。值隙而後攻。逢利而後爲。可而奮。不可而止。避其銳。問其情。邀其歸。厭其所不能。無促以功。則功易成。無必其期。則戰易勝。此亦一端也。客曰。未也。請衍而

申之臣曰。敵之來。因糧于我。聞景德時。大敵固營不動。而游騎四出。發窖竇。略馬牛。係老弱。刼樵採。旦而出。夕而內之軍中。仰以濟師。當此時。諸將熟視。不出一卒以乘其敵。由是肆然燔室廬。殘邑聚。逮于講和。河北爲空。此一失也。又詔書勅諸將。深及境則止。故敵勝則驅而進。不勝則不畏而退。塞外之人接堵。而吾鄙不聊生矣。此再失也。夫敵人惟勁鏃遺。長刀築脅。乃怖耳。當抄騎之出。我若以邊人邏士邀之。或膠其左。或扞其右。蔽林伏垠。掩所不防。但令無所獲而走。不過五日七日。衆飢師老矣。以吾飽。衆彼飢。何攻不破。何擊不北耶。敵之入塞。掠吾老弱畜產若干。我伺其便。以五六月馬瘦弓弛之時。勒偏將出塞。虜其部屬牛羊亦若干。相當即止。敵所恃以爲富者。特幽薊耳。彼能殘我河兆。吾一支病也。我能殘其幽薊。彼一軀廢也。若是。則敵懲艾計較。必不敢輕入矣。漢武帝使衛青霍去病深入。屢闢斬匈奴首級。最凡十四萬而已。北狄遂衰。此驗在前。可質也。故曰。不殺不怖。不傷不刈。不得其當不止。此上術也。客曰。太守計雖審。然與嚴尤班固之說戾而不合。何哉。尤之言曰。周秦漢三家征匈奴。未有得上策者。周得中策。漢得下策。秦無策焉。又言。宣王時。獫狁內侵。至于涇陽。命將征之。盡境而還。故天下稱明。固之言曰。來則懲而御之。去則備而守之。此聖王制禦蠻夷之常道也。臣對曰。尤固皆中人俗儒。不足與論天下計。彼皆得皮忘髓。齧脰脆而未知雋腴也。唐牛僧孺嘗詆尤以爲御戎無上策。秦爲無策。非是。世謂知言。夫禦戎無上策。必以強武服之。所謂武。未有不殺而能威之以武。秦漢是已。然秦與漢自以他失爲後世

譏病于計。匈奴不爲無功。尤盛贊宣王。以及境則止爲明。非也。宣王興厲王之後。奮衰氣。遂強敵。威不能加于狄。故及境而止。詩人姑美其能中興。不美不追賊也。易稱高宗伐鬼方。三年克之。伐而克。非不伐章章矣。故曰。來則懲而禦。去則備而守。殊可嗤怪。必如所言。是兵常在邊。而弛甲無期矣。故曰。尤不足與論天下計。

篇之四

客曰。敵之來。常因吾糧。故朝廷以清野困之。常獵吾民。故堅壁挫之。今日北邊高城濬池。樓櫓堅密。比景德有加焉。一日契丹送腰領。其可以制敵乎。對曰。能捍敵。未足以制敵也。吾野雖清。吾壁雖堅。若鎮定兵不出。敵猶敢負戎馬足。直驅深入。擣虛而奪人氣也。曰。然則奈何。曰。敵之中軍。其大渠常自將。我若使鎮定兵從之。與相上下。吾常環車固壘。出輕騎擾其餉。擊其鈔。夜譟其營。彼求戰不得。攻不能下。掠無所獲。大衆老而懼。吾因其懼而舉薄之。無不勝矣。前日敵人犯定軍。夾唐河以陣。彼不能勝。因舍定攻瀛。破其外郭。又不能克。乃直走澶淵。是時定軍尙未出也。由此觀之。吾失在不戰矣。太守是以知今日邊臣專修守械。不爲攻戰計。未足以制敵也。客曰。然則今日樓櫓城隍。果勝于異時。臣曰。不然。祖宗時有北復燕易意。故不專于守。今者專于守。故城益高。隍益深。勢自當然。非今人工昔人拙也。客曰。今日朝廷分河北爲四路。可以經制乎。對曰。甚善。無事時。訓師徒。撫風俗。便事之宜。治葺保障。督官吏能否。鼎峙而立。其效過



異時遠甚。一日軍興，猶須卽河北安撫爲大使統而一之，乃可責功。又鎮定不可裂付二將，宜及平時并爲一路，使將佐部分有臂指之勢，輕重相權。誰曰不宜？滄州東薄海，南倚濱棧，斜視淄青，北與敵接，其間棄地各數百里，土鹹渴，水泉不可食，夏蚊如雲，不可居也。至冬，萑葦際天，紆細商賈未嘗行，故朝廷輕其戍，列數堡而已。景德之後，守臣廣陂障，蓄水接海，又黃河限其南，是以議者超然不以滄州爲劇地。自河決橫壟，商胡游波紆浸貝丘，盪永靜，環海而北，破乾寧，恣肆放流，以入于海。凡游塞下陂水數百里，皆爲平地，則濱棧淄青失河之險，未有以恃也。我未有恃，則啓戎心，故不可不慮也。是宜權建滄州爲一道，以扞東陲，伐敵之謀。然止十年計，河若用道，滄可廢矣。客曰：塘水之險可恃乎？吾聞議者或謂不然。對曰：塘水東西斜六百里，其闊百里或五十里，夏浪冬冰，淺不可載舟，深不可亂而濟，足以挫敵騎，突怒省亭堡之防也。然議或不同何哉？蓋議塘之利者不列其害，謂害者不該其利，是以聽之似可用，質之則無有也。客曰：其害奈何？對曰：昔之蓄水爲塘，其制曰：若千地淺若干尺，若千地掘而浚之若干尺，相錯如繡，是謂深不可度，馬淺不可載舟也。後人忘向時之制，惟因霖潦時漲而廣之，故壞民良田，無有涯極。而議者詎無涯之害，因忘設險之利也。客曰：若何而可？曰：邢鎮定皆西倚山，水泉悉輸東北，其地西高東下，若建瓴于甃然，昔之爲塘必掘而浚之，所以留水也。今若接舊法爲塘之限，闊不過百里，狹不下五十里，隄而限之，亦足制敵人之入爲中國患。又得良田還與民，則利害曉然判矣。客曰：可爲無窮利乎？曰：百年計耳，水

源自高而注者，必歲淤而月厥，如今不掘而浚，弗出百年爲平原矣。

篇之五

客曰：敵人負其衆，中國常爲之屈，將天運乎？亦人謀有未至耳。臣曰：儒者不可舍人而言天，意者謀有未至耳。祖宗事太守不及知，直以慶歷時驗之，敵人乘西鄙方擾，哀衆叩境，作謾言求關南十縣，時議臣倉卒直以十縣歲賦纔二十萬爲對，故歲益金幣二十萬與之，因欲塞求地之請，敵由是得自大，謂不遺鏃缺刃而成功，妄言以夸示其下，由是縣官用度益急矣，殊不知與敵二十萬，則其地固其有也，彼且緣爲辭曰：吾不取賦而還吾縣，卽是朝廷植今日之禍根，取他年之亂實，已失吾財，又亡吾地，尙謂國有謀乎？故曰有未至焉。客曰：不然，是時不許其求，則戰，我兵未合，必爲敵乘，故爲一切之權以亂其謀，子何昧焉？對曰：等爲之權，不如直以百萬賂之，使罷兵，既不爲無窮之饋，又使他年絕旁緣之辭，不猶愈乎？客曰：敵人得朝廷之賜，充足其欲，然常以虛計搖邊何耶？對曰：契丹君臣合謀，以爲取二十萬于我爲無名，謂我且嘗膽以圖其國，刷恥取償焉，是以歲閱馬料衆，治橋路郵舍，以自張大，外又挾漢爲重，制服諸戎，太守固知虛憍而實衰也。客曰：如此，何計而宜？對曰：莫如自治，所謂思患而豫防者也。今朝廷英俊林立，豈謂無人，但莫適任患，故功不立，糧可廣入也，而便糴日改，法下不信，則塞下之倉庾空，財可豫積也，而有司辭以用乏，客而不出，則塞下之帑庫空，馬可孳養也，議者媿媿日推月引，苟安其任，終不肯盡力，則塞下

之牧廩空。不止三空。又有五可謂。騎軍多馬少。三分其人。馬纔居一。士旣不可爲步。是畜無用之兵。一可謂。河決澶滑。橫流不制。壞陂障。破漕渠。失國所恃以爲防者。又破滄州。歲費七十萬。朝廷玩之不爲塞。二可謂。河北義勇且三十萬。著令歲一大習。盡一月止。用古一時講武之義。而州縣避事。或歲未稔。民且困。卽罷之。又惜數萬石之廩。歲爲此言。雖有教閱者。不爲部伍行陣。如小兒戲。卽止。又流亡物故皆不補。十耗三四。自謂便民。民之便。國之不便也。三可謂。緣邊守將。輕授而重任之。重任而輕易之。衆皆知不肖。而朝廷謂之能。見效無狀。而歷任累其年。一日警急。是輩巽懦奔走。敗軍損國者也。若迺公忠材猷。嶄然風采。士不肯袞袞雷同。欲卓爾自立。時或有之。但一失意于銜命小臣。則飛奏朋毀。使內不能自明。上有以爲惑。一紙詔移他路矣。是以不材者在。而材者去。四可謂。近年議邊臣。公用錢尤急。剖粒析毫。探候間諜。無費募召。比蕭德吳滿等告西人之和。足及藁街。尙未得其奉使意。此迺所責小。所失大。五可謂。故曰。三空宜早實。五誚宜速除。居安慮危之至計也。然朝廷每得敵人一好言。便釋然高枕。至邊戍奏請。罕復報下。得一妄語。焦心不終日。督切邊臣。宣勅紛然。此似未盡其情。夫用兵以狙詐爲本。凡不足示人以有餘。強示人以弱。兵家常策也。景德時。敵人窮兵深入。豕突澶淵。先時令王繼忠累表乞和。兵益急。表益來。會伏弩射殺其將。敵大懼。因遂講好。先帝不窮其姦。而與之盟。此已驗之效也。故得敵好言。可聽而不可怠。得敵惡言。可防而不足懼。不懼謂何。自治有素矣。

篇之六

客曰。敵常籍諸戎兵。席卷入邊。故河朔之勢不支。子何以禦之。苟如子之策。可決勝乎。對曰。大衆不足恃也。其取勝者在中軍而已。中軍不振。諸渠長且土崩。雖衆何賴爲。夫鎮定在河朔。兵第一。今使悉衆從彼中軍。與相進退。令瀛魏軍當渠長。縱奇兵擊鈔騎。河南列屯營。謹守澶淵。餘州皆清野以待。不逾月。敵必飢。飢必求戰。我畜銳不發。以羸畜弱卒嘗之。待其爭而囂。則整師伐之。無不敗衆塗地矣。然中國不用兵五十年。軍有所未習。先屈而後勝。未可知。用之數年。習知委曲。則士心侈而樂鬪矣。士見所得財珍馬羊。皆自取也。所上首級厚賞也。死事者卹其後。奔怯者無衆寡必戮。罰信而賞明。則士氣銳。將謀果。人心定。不止禦自來之敵。可北圖燕薊矣。夫燕薊契丹恃以爲強也。故太宗已平河東而先取幽州。聖謀深矣。故不復慮北契丹不可臣。客曰。子言太高。恐不爲時所信。且陛下爲四海屈已。斥銀幣五十萬爲年賜。使者賀正月慶誕日。廷勞答貺又十餘萬。西夏三十餘萬。大抵直百萬歲棄之二。睡安天下元元。德至厚也。子欲輕動干戈。爲國生事。非策之宜。對曰。唯唯。太守所云。非謂欲朝廷舉兵討也。直因其來而豫爲計耳。敵之南牧。必先犯鎮定邢趙瀛魏。以地平易戰。民富有易擾而多獲也。所在發掘鈔略。終無顧巢窟意。夫敵留吾境。大衆不輕動。吾可用奇矣。若令輕騎挾半月糧。出河東以殘雲應。出雄州以襲幽燕。治戰船數千。載半歲食。出青萊浮海以動營州。縱諜者告敵。能安然不畏乎。北敵旣還。吾輕騎戰船歸矣。故彼歸我出。

我出彼歸。不數年。敵山川險要無不究。則彼自保不暇矣。朝廷又出寶貨募使者。走間道賂新羅達鞠黑水等。以謀士隨說之。許以重爵。割地與之。平使叛契丹。彼不從。必露言于敵。敵且內相疑。若聽吾命。敵固失援矣。此皆伐謀紓難。可先計而後用者也。客曰。或言契丹歲得銀幣五十萬。庫積充滿。安肯自爲送死。彼之來。不過略河北數十州。固無五十萬之獲。敵雖愚。肯舍安受之。貽與朝廷。決不可必之勝也。子試策之。此言是乎。非耶。答曰。今者敵君臣皆不肯。殆有是矣。彼其臣爲王謀曰。宋所輸珍寶。君皆自得之。今若縱兵抄略。所得財皆散于下有功者。君又將傾府庫以償。然則違盟而戰。下得所欲。上喪所畜。君且有勝負之虞。將何事焉。太守策之。此北敵所以遷延自安。未肯作反計。昭昭矣。

### 篇之七

客詰曰。子策契丹不反。然子之在中山。所統九州軍。修樓櫓。濬壕隍。畜糧增馬。勒部伍。無日不討于兵。何不自安。對曰。客言非也。兵家有云。無恃敵不攻。恃吾所不可攻也。彼雖未叛。吾備何得弛乎。常治所以待亂也。不虞是其可虞也。前所謂敵主孱。其子長也。而弟又凶德。一日敵主疾病死。弟與子必爭其位。爭而勢分。有弱有強。強者與我爲敵。則弱者求吾爲助。許之強者。怒。不許弱者。必致讎于我。彼習知邊鄙怯懦。漠地富有。故攻所易攻。以自長雄。不可不爲之備。又其弟得國。必恣狂勃。先剽劫于邊。左右素不懽者。將妄誅夷。雖不保終。要能爲疆場患。朝廷尤須以兵鎮撫。所謂待亂也。慶歷時。敵主將叛。乞師于諸戎。皆以

兵從之。約曰：所獲人畜財貨皆自取。衆戎喜。日夜馳且南向。會與敵和。各罷歸。衆戎皆悲曰：欺我使來。因大掠幽薊間數十縣去。契丹不能禁也。今敵主再遣王綱約諸國借師。皆曰：又欲如前欺我乎？不肯出兵。故去年八月遣使叩塞。告與西夏絕言甘而禮厚。正以反謀未成。爲詭計欺朝廷耳。異時能得諸戎兵。卽又尋隙責言。肆其沓貪。此謂可虞也。故太守欲朝廷自治。以待彼亂。常備不虞。奚待可虞也？又況歲出貲百萬賜二國。此寧無窮。垂子孫計耶？水旱疾疫。古今代有。假如萬分一中國遭三年之水旱。數千里疾疫。南方治課不登。而上取無涯之財填沙幕之北。是自困天下者也。天下窮則厚取于民。厚取于民則怨。怨而不亂者。未之有也。彼將乘吾之困。民之怨。責吾所輸。悲氣直詞。歸曲于我。此不謂倒太阿假敵以柄乎？太守聞異。時縣官歲與銀皆還入漢邊。相貿易。官得什六。歲益三四則略足。自慶歷後。敵禁止銀不得復入邊州。且十年。此欲困中國。非一日計也。自和盟以來。歲與三十萬者四十年。五十萬者十年。契丹所得銀幣凡千七百萬矣。有如他日敵復壓境。又欲如慶歷時增歲入之物與之盟乎？故莫若先自治。待其來。勒兵因以威武示之。如前所陳者。我威一立。與之盟則固。與之惠則悅而易臣。有所賜予。不過二三十萬。則天下之財不至乏。垂之後世而易遵焉。

# 景文集卷四十五

## 序

大樂圖義序

〔案〕崇文總目：邢著太樂圖義上下二卷，當在景祐時上。

臣聞至樂之作也，本于天理，藏于人心。天理難乎象見，故推數以成律呂；人心易以假物，故探和以寫金石。音之所比曰曲，聲之所集曰音。細大得所曰平，驕僭不入曰治。然後詩以文之，舞以動之，歌以長之，盛薦上帝，升配祖考，邦國以和，神人以諧。疵癘不作，陰陽來肆，君子得其道，小人得其欲，樂之時義其至矣哉！昔聖人之制作也，以律呂造夫婦之端，宮商合君臣之誼，塤箎寄伯仲之睦，琴瑟懷志義之思，舞綴以觀勞逸，宮軒以等貴賤，非爲娛于耳目，取玩于性情。自周衰去聖，世變風移，玩其所以爲音，略其所以爲義，去易良之轍，迴回通之波，或窕或樞，或流或湏，宋鄭緣隙，桑濮增華，新樂遂興，而至樂隱矣。是以宣尼皇皇表于云乎之嘆，子夏勤勤納其非聽之說，而後新聲盛于漢世，雜謠譴于江左。成器亂于隋簾，吳曲併于唐歌，國教相沿，民心積習，但聞滛澣之尚，不見雅頌之全。是故衆邪勝正，羣雕散樸，而人不可與言樂矣。夫古樂今樂，大畧可詳，古之樂也，攷中聲而求之，迭主均以生之，故黃鍾九寸而爲律本，其爲聲也，高不凌下，不犯從容，舒散清明，博大隱然，常有法度，而得節奏之中，故聽之者樂不及蕩，過不至哀，今之

樂也。大則倍之，使不及聽；小則促之，務以爲玩。濁外飲濁，清表增清，故其爲聲也，或震蕩，或嘒殺，去本律，犯他聲，繁錯曲折，以爲要眇，蕩然無有法度，可畏。故聽之者，廣則容奸，狹則思欲，驕極而侈隨，溺終而哀來，其不可也如是。夫天地之合，自有中和之境，以寓大樂，不至者，堙鬱亂國之音。過之者，悲哀亡國之音，是以聖人之常，據中以御兩端，故過色縵聲，無自入焉。諒非不世出之主，甚盛德之君，疇能上懷千古，以示來裔。皇帝陛下，丕紹景歷，勤經大猷，百度交修，九歌惟敘，因太常署周王朴所製律準，遂推正聲，別製新曲，出入韶勺，軌度英莖，被之絃匏，絃匏以協，移之簫籥，簫籥以調，發而不散，幽而不密，德全而文，緝氣盛而化神。太和薰然，四極爰臻，而有司孤陋，無京房荀勗文收孝孫之學，不足以奉承盛德，觀海靡涯，步天無階，口誦耳剽，尙所未暇。又況敢望清光，助萬分哉。然乃知前聖後聖，未嘗不垂意于成功，留神于作樂，因律以本萬事，卽音以平八風。蓋樂樂所自成，明有制也。用先王之樂，明有法也。作樂之本，非律不生，非聲不協，非音不寫，非均不諧，而史氏樂家，所傳至廣，聯絃圖，祕廣內，或未接帝覽，或有煩書程，紛綸葳蕤，弗獲其要。臣竊不自揆，輒推本前人六律五聲八音七均之說，及三大禘所用之樂，古今宮縣升歌之異，上列爲圖，後詁其義，并今樂署闕典所當釐補者，更爲雜論七篇附焉。總目曰：太樂圖義析其卷爲上下，惟歌舞于律呂差遠，故不著于篇。臣又聞先民有言：知而復知，是爲重知。陛下攸總聰睿，胸合天德，樂之元本，已知之矣。而臣重以爲言者，乃惓惓于効忠，亦思不出位，以備裨官之一說云爾。淺聞孤學，懼不



足采謹上。

登科記序

眞宗卽位之八年。匈奴寇河朔。旣而邊鄙入保。民屋始驩。赤白之囊。狎至于宰府。燧燧之火。幾照于甘泉。則齊趙北邊蕭然苦兵矣。于時帝怒有赫。天威遐震。矯成周之中策。黜灞上之兒戲。親紆宸御。以見武節。至仁由是無敵。有嘉于焉折首。一戎大定。六羸遁去。方見鑄劍戟之器。以復九農。納虎豹之皮。講其五利。渙焉大號。民見胥悅。而天子憫黎元之重困。懼俊選之猶鬱。特詔大河之北。別從多士之貢。深詔方國。妙覈眞僞。于是衛多君子。賁然來思。燕固奇士。此焉游處。時則有若狀元蔡公。負卓越之志。偶隆羨之運。哀然舉首。揚于王庭。天不違顏。肅陳其下拜。手之所觸。竝會于餘地。削牘程奏。上心嘉歎。見主父而何晚。擢平津于第一。自公而下。預選者纔十有三人。儒者以是榮之。才難不其然矣。雖周人諗王國之盛。文皇發吾穀之嘆。疇以加之。而公美魚油之得賢。遴菁莪之樂育。罄夫感遇。形于論著。乃次登科以來聖製表謝。及奏御辭賦諸公詩筆。凡若干章。總題曰登龍記。先之以制詔。尊君命也。次之以賦頌。歸臣美也。雜之以表奏。思報上也。終之以詩筆。王澤盛而頌聲作也。觀是深旨。足以知公之志焉。惟公深博有謀。惠訓不倦。善斷也如竹。迎及而解。善教也若草。望風而偃。平居感慨。常自比管樂。臨事忠盡。必思致堯舜。不好延譽。自結明主。故處身也。高明無內熱之誚。歷官也。私室乏謝恩之所。好尚儒雅。而敏于吏事。六爲章句。而得

其體要。凡所譏述。必究遠大。成雖少選。沛若緒餘。信猶夫吳王金錢。乃往往有之。楚國雲夢。特小小者耳。夫器之博者。無近用。羹之太者。有遺味。故公之所著。直取其切。與夫彫章縟采。不周于用者。將有間矣。議者謂公奮英蕤。取殊絕。探天下之深志。訓天下之方動。使得其位。雖式百辟。理乃事可也。豈一臺即可盡其用哉。某謬爲公之知。爲日已久。零丁孤苦。辱泣然而見於倅。伺顓蒙。已瞠乎而在後。每勵驚寢。冀酬題齒。頃因假日。得公前所著書。惜其事美隆平。當時名未白著。爰敍本末。以冠篇首。噫。得人爲盛。當知天下之奇才。垂美方來。信是傳中之嘉事。博雅君子。其有取焉。

送張端公轉運兩浙序

國朝析揚州具區之地爲二瀾。以建行臺。北匯三江。東引五湖而注之海。盡瀾分也。地殖稻魚。山採鉛銅。熬鹽賦苑。錯出珍貝。飛爐長帆。以輸都藏。號令經營。天下之甲。故漕局兼按。必難其人。歲在庚午。夏四月。清河張君冠柱。後惠文。以二千石持節領使。東南之利。得盡商之初。君以粹和文明。夷靖強立。毅然聲采。出諸公間。培風覽德。遂筵鷁鷺。乘傳蜀道也。按讞平允。除繖繞之禁。屬城畏之。佐治天邑也。精力靡暨。迺密靖之風。都人宜之。話言藝極。優爲沛力。堅金所柅。而羣蹠就制。大刀所奏。而衆獰洞分。惟二宮亦知其能。故淑旂赤裳。倚君爲重。噫。君又將推二方之善政。化吳粵之細民。檢其放佚。毆之忠厚。底慎財求。推明章程。幅利便民。振淹糾隱。緩閣更賦。悅息夫家。將使一方之人。和聲善氣。韻爲景風。蒸爲甘露。予知夫誅

求辜權權譎一切之政。自君革焉。齋刀啟行。朱芾在股。行矣強飯。企乎令聲。公卿有缺。予又將見君之入也。謹序。

### 南陽集序

曩予以布衣。偕計來京師。凡當世有名士。必求得其文章。盡疏之牘。凡數十百家。其間南陽趙叔靈詩纔十餘解。清整有法度。渾焉所得。不琢而美。無丹牖而采然。恨未見其多。瘖醴亟醕。聞雅音不竟曲。其嘵于願也。後四十年。予爲益州。于是叔靈之孫。扞以殿中侍御史。領益路轉運使。始盡得叔靈所集。疾啓而玩。快然乃大償所素。則詩之外。又有文焉。其文恢動沈蔚。不減于詩。然叔靈以詩自名。信其好也。叔靈名湘。淳化中貢進士。未試而春官已題其警句于都堂之壁。俄中第。調廬江尉。闕其官。生平所蘊。未及設張。論著不盈志。名雖在四方。而不徹天子。賁恨大宵。與化而蟬。報享之昧昧。使仁鄙一歸于數。可勝嘆哉。殿中曰。君旣知吾祖。請遂冠篇。以信于傳。予曰。諾。大抵近世之詩。多師祖前人。不丐奇博于少陵。蕭散于摩詰。則肖貌樂天。祖長江而摹許昌也。故陳言舊辭。未讀而先厭。若叔靈。不傍古。不緣今。獨行太虛。探出新意。其無謝一家者歟。惜壽奪其壯。不克廣取而究述。寧天子詩有所嚮乎。殿中蹈履址。復有名于時。爲天子才臣。則叔靈弗大于身。而大于後者。身雖沒。其言意所謂不朽者。叔靈尙無憾云。

### 送薛嘉魚序

昔孔門第十哲之行。及其敍政事。則先文學而後三科。班氏稱西京之賢。至于列循吏。則次儒林而爲傳。乃知決科者必深達國體。執政者當輔以經術。故廣位求士。無取有名。炎漢決獄。專附古義。用能使遐邇輸嚮。驅躋仁壽之域。中外僉屬。財成義理之文。行之惟艱。兼之則寡。非夫詳延博達之士。精白廉茂之行。誕彰凝猷。秀出人表。安可宣深厚之訓。明以諭下。樹尤異之績。轉而上聞者哉。河東薛君。稟淑茂之姿。生孝謹之族。粹性中積。道文外發。弄翰弱冠。乃卓犖而觀書。游刃三年。遂躊躇而滿志。休譽隆洽。雋聲流聞。旣而揆藻紫庭。飛英文陛。天子嘉危言之策。喜于同時。羣公欽未至之名。居之右席。乃命以位。出彰其材。試清秩于芸局。奉成規于縣道。惟君天資謹厚。而敏于吏事。政經嚴備。而飾以儒雅。按讞之際。多所平反。筆硯之間。皆有方略。乃至健訟連捕。巧詆成紆。捕逮紛紜。充曹而物府。牒訴慳慳。置坐以裝懷。食肉未能遠謀。歷政號爲難治。加以山澤出納之計。米鹽調發之勞。抗敵旣深。詿誤增劇。簡書旁午。按劾而靡遑。簿領相仍。沈迷而未破。君必發摘囊橐。刺取是非。思若有神。心無留義。解盤牙于餘地。析臧否于片言。吏不敢欺。民是以息。先是君之任茶陵也。故外制陳公。以史閣之職。領漕運之權。益召高材。坐鎮雅俗。始聞君之治迹。深所嘉尚。以爲當世之少雙。及見君之行事。又條于屬郡。以爲治行之第一。特發山公之密啓。以竢漢皇之增秩。逮考績于三載。且奏課于十銓。式奉絲綸之言。再莅子男之邑。驥子絕足。宜顧景于中原。鯢魚揚波。猶暴鬣于碣石。而君深達大觀。雅量不傾。增修素風。清議益注。豈銜鬻千數。方朔無自薦之言。

屬和數人。宋玉有彌高之嘆。當淹速之由命。寧地勢之使然乎。秋八月。理棹大江。揚舲明發。諸生供帳。賦漢客之驪歌。彩服調甘。奉魯侯之壽母。施于有政。何樂胥多。見夫十室之民。將受其賜。百城之長。拱以蒙成。當使蒲邑駐車。善三稱而未盡。齊人易俗。政五月而有成。自餘恢明道綱。激昂盛世。奉行無故。祛膝辭之煩。坦懷至公。無樽俎之越。朝有好爵。官無費留。勉揚令聲。用速殊命。謹序以爲送。

### 送刁君績序

建木百尋。不殖培塿。明璣千珎。必產溟渤。賢人君子。出于代家冠冑。亦猶是焉。君績于九郎。生于慶門。不習執轡。而天與之器。道資之粹。弱冠哀文。贊諸公。悉倒屣握臂。爲延譽。大抵爲文。旁礪史漢。上下隋唐。理參文表。氣注言外。競于使人。不能加也。旣以父任。隨牒參姑蘇戶曹軍事。未行。而鄉舉秀選。君績因褫黃綬。衣逢掖。與羣英竝游。求三物之舉。爲攸司裁抑。以非是報罷。薦紳處士。悵然同咨。而君績方夷然不屑。以謂非戰之罪。近乎命。不怨勝已。近乎仁。道之苟存。更何恤也。翌日。拏舟東下。句言爲贈。先時隴西李獻臣。爲君序字。以表其德。獻臣。文之雄伯。士皆嚮嚮。言所許可。重于陽秋。而相許于朋盍之間。則君之取重。足以暴天下矣。矧旦夕拜某公爲二千石。朝之宗工。太原王子野。關郡主人之賢。方是行也。君績挾汝南之評。據山東之閭。輔儒雅之飾。以求伸于賢主人。譬建瓴走丸。不爲難矣。何徒勞之足累哉。僕之妄庸。不足增重。若夫復九變之貫宣上德。刺六經之道潤吏事。有所劇切者。第見子野索言之。謹序以贈行。

送張都官知兗州序

先皇帝既釋涼州之旅。夜索會昌之圖。震于殊尤。詔成希閭。鏤肪玉之祕牒。上完青于翠巔。還坐明堂。膺倪寬之壽。遂覲東后。會帝姚之巡。濟北益獻旁邑之地。羣臣皆治朝宿之邸。壇墠修飾。牛酒和會。順祝馳禱。使轍相望。肺腑既祭。縣次傳送。于是兗爲巨鎮。冠于東方。則吏二千石宜其遴簡。清河張公。以三署郎選爲百城吏師。踐揚諸難。莫匪嘉績。實有成命。俾侯于東。以公文敏之才。條教可紀。是式是力。有猷有爲。則變道之邦。易以從事。闢略奇細。宣導湮鬱。洒其煩言。化爲頌聲。則僊蘇之民。樂于嚮方。將使上飲靖嘉。下無滅裂。桑林經首。出庖丁之餘。蟬綏范冠。爲子皋而化。給儲偁貢之藝。愼齊疾馭之神。公優爲之。非月而已。若乃理狀異等。爲吏民嘉美者。姑見轉而上聞。以續西京循吏云。

送杜僞罷舉北歸序

選士之制。其來尙矣。昔者東家設教。十室有求信之言。西漢掄材。三適著有功之義。左雄建限年之制。始汰末流。楊綰復射策之科。專收秀業。殆夫質文史野。家國異殊。有拔十得五之稱。有取貌取言之失。蓋當塗之士。推閭閻以居多。負俗之賢。遺丘樊而亦衆。今猶古也。吾見其人。杜君茂才。生齊魯禮義之鄉。被洙泗詩書之化。韻宇凝峻。天骨超邁。素履靡劬。雋聲自高。太沖門庭。期十稔以無廢。方朔文史。遂三冬而足用。旣而北方重陳良之學。稷下揚田巴之音。藹然令名。冠映多士。會稽之箭。蓋鏃之而益深。宣王之雞。皆

應之而返。學且優而達矣。時旣盛而明矣。由是奉鄉書而得薦。偕計吏而來賓。生芻素絲。邑人推平津之舉。陽阿驥。褒列侯重祢衡之薦。自是朋友稱其長者。公卿處之右席。望風附景者。無虛日矣。亦旣就試。宗伯奉御天子。引對紫宸之殿。接武丹泥之塗。思若有神。文不加點。特以一字之誤黜于盈庭之議。漢臣護譴。由馬尾之不全。衛國棄裘。實羔袖而爲累。方之小過。蓋其倫矣。噫。君子出處。隨道污隆。賢人進退。與時損益。不可豫謀者道。所以罕言者命。且孟軻之德也。淪于連蹇。醜蔑之陋也。失于不言。馮衍之材。閉關而卻掃。買臣之智。負薪而行歌。繆牽之長。騏驥累于千里。按劍相盼。夜光屈于閭投。莊助少貧。爲友摺富人之辱。淮陰無行。困下鄉亭長之炊。求之典章。皆有肖象。至若鳥有鳳而魚有鯢。楚人之深喻。垂之千古。夫豈徒言。若然。則一告之微。一慮之失。推之至道。何足動心。龍以蟄而存身。井可汲而受福。時之未至。夫亦何傷。秋七月。言自南州。將謀返旆。嚴駕有日。贈言是徵。勉哉是行。無或憤賈誼之少年。恥主父之不達。異日覽德輝而下。求善價以沽。焚舟孟明之河。拔幟成安之壘。揆天摘藻。一座盡傾。瞑目奮戈。千人皆廢。然後見其能也。泉壤搖落。草木變衰。臨潯壑以怨遙。掩金觴而誰御。冥鴻可寄。無忘遠客之書。封傳再來。顯俟長安之笑。謹敘以爲送。

### 江上宴集序

江山之助。本出楚人之多才。朝野之歡。古有西京之全盛。至若愛心兆和柔之感。樂地遵名教之宜。乘春

陽之布和。均秋水之至樂。伐木醺酒之蕘飲。舞雩初服之詠歸。我有嘉賓。茲爲勝集。攝提紀歲。姑洗協月。雨師泛灑。女夷鼓歌。熙熙若春臺之登。湛湛美神祺之布。予乃旅食後乘。遑安治世。烟煤久渌于楮鼻。帶罕趨于寺門。居常竝田蘇之後游。間或追永和之禊帖。況乃茂林脩竹之地。良辰美景之資。風泠泠而析醒。天蒼蒼而正色。睨沆瀣之綿野。泝逶迤之曲水。默舒帟幕。惟旅殽核。則有黍飴多聞之友。藁府同官之僚。玉趾竝紆。鶴蓋相蔭。右揖浮丘之袂。往至高陽之池。日車晏溫。雲旌澄廓。敍食劑。則醢醢肉菹。饌饌鱸鯉之殊品。述樂事。則巾角履齒。明瓊多馬之雜進。遠睨勢勝。則璇淵秀壑。峩峩湯湯。風雨怪物之馮戾。近玩物態。則標枝薦草。離離鬱鬱。陽膏協氣之儋位。終之美康衢之謠。述何力于上帝。末亦樂開口之笑。歸已分于百年。終宴不疲。肝豫無悔。逮夫山玉頽于既醉。弁星俄于屢舞。善說史漢。何必西維之朝賢。竝坐胡牀。未淺南樓之老子。而諸公惜茲眞賞。命誌方游。顧急景之將斜。璧珍枚而見託。河陽思歸之引。恨不遇乎知音。大夫登高之游。惜未聞于麗賦。聊題狂墨。增愧塵襟。時年月日序。

春日同趙侍禁遊白兆山寺序

敦牂紀歲。姑洗叶月。樹草以樂。原田以滋。春服既成。詠雩風于沂水。衆賓咸集。修禊事于山陰。時則若天水公。感節物之鮮榮。乘微巡之暇豫。覽朝野歡娛之盛。動山水仁智之心。精驚幽經。神馳宏域。吏且休矣。伍符尺籍。以無煩神且寧矣。緩帶輕裘而自適。于是追盛集。晷良辰。弭節乎平原。按轡乎遐路。惟茲山之



奇挺實列仙之游化。瞻言福地。有鬱靈蹤。由是嘯侶以登。方斬而往。歷紆餘之盤道。頓岑寂之祇園。旁睨崇巖。前識翠阜。九向之勢。與朱陵而竝驅。萬壑之流。疑會稽而爭長。若其丹崖披壤。牝谷凝神。觸澗成渠。值林爲苑。跳巒崎嶇。緣雲而上。征飛滂神泉。相背而異態。固可駭也。朱蕤幽茂。飛英幡纚。羈禽聳聒。纖籟悲鳴。清飈徐動。徘徊于桂叢。泄霧未凝。彌漫于壤石。又可樂也。爾其陟降嶢榭。顧步飛楹。送睥子于次寥。暢襟靈于閒宴。故足蕩胷中之鄙吝。究眞際之虛徐。發金記之吾圓。入毗邪之不二。紛華外泯。識富貴之儻來。韻字中虛。冀神明之攸舍。自餘布金結瑤之麗。飛錫浮杯之侶。繡棟文楯之纖縹。繚垣紺宇之靚深。燦然異觀。不可殫記。斯亦視聽之瑰奇。巖藪之魁殊者哉。天水公慨眞想之在襟。顧翔陽之俄景。竝徵麗唱。以賁靈陬。且念登高能賦者。賢哲之令猷。因物造端者。述作之常理。紅泉碧磳。播康樂之詠歌。高樹文禽。形應璩之嘆息。顧情所屬。來者難誣。某猥辱嘉招。備觀勝概。登崇望遠。喜先生之竝行。進牘含毫。愧吾黨之狂簡。故非善敍。聊用直書。時天禧二年三月序。(案)是時祁年二十二。

### 宋同年劍池編序

劍池編者。宗兄貫之之作也。初。貫之自七閩西入關。才業銳甚。鼓行英俊。中京師諸儒。少敢支吾。時上新卽位。至于親程材品。謙讓未遑也。第覆有司所校。臨軒句唱。署定其籍。君以文中乙科。爲吏限牽制。調歛之休寧尉。未幾。州將或以親致嫌。改洪之豐城。而君自褫巾仕塗。間關勤遠。晝治夜計。推行靡密。然未嘗

一日不在書研間。故其點翰患多。操觚應卒。思風決然。言泉沛然。如良庖鼓刀。羿子設弓。導竅不頓。舍矢如破。用是四周歲籥。所得詩頌贊紀序啟書論若干篇。題曰劍池識方游也。還都之日。哀而見過。且以冠篇爲託。僕辱君之知舊矣。不命其承。況勤誨乎。原其天分人之能也。甚斬而難悉。雖有力者不能多取。故史家以儒林循吏各自爲傳。猶函矢工其一巧。盆天廢乎兩施。豈若貫之進職其憂。則治日居最。退立以討。則懿文益辦。若使力命相會。其至淺淫本原。張旺枝葉。未可量也。昔年長好學不勸。惟聞袁伯。每官各爲一集。獨有王筠。由是而觀之。其有意乎作者之事矣。若夫文之研麗令精。自當觀發而知。此不遵數。謹序。

雲門錄序

道之概。及言而麤。言之微。至書而畧。然概而不得不強者。道。麤而不得不謂者。言。畧而不得不著者。書。忘言之言。未始有言也。可道之道。未始有道也。故雖終日示吾境。鳴吾喙。汗吾簡。我何累哉。若大士永詢者。其有言而無累歟。惟師得于禪師善。善承寬。寬繼雲門。雲門于法最先覺者也。夫得無所得。是名得法。覺無所覺。是名先覺。故師以景祐龍集乙亥。卽荆南福昌寺。甫坐道場。天駒玉象。蹴踏羣勢。黑白咨求。悅而承風。一緣萬應。無有中畔。故其語非牽合屬綴。非粉澤華藻。順俗悅凡。獨妙逗機。欲令昧者得入。知者徑悟。空文多言者無所旁緣。自唐以來。斯道遂顯。諸老大乘更提而迭唱之。高足上首奔走譔集。蓋別行一

趣不得而闕。今道隆所錄，亦由是乎。若乃憑默遺言，默境已立，用遺遺默，遺情彌熾，如我說者，物至則應，不爲言言，理解而止，不爲默默，言以交薦，不爲遺遺，圓裏妄真，以合大方，曩之爲雲門，爲寬，爲善，今之爲師，一用是說，無二道焉。齊安守史館麻君方之，契師道緣，間不容翳，哀錄抵僕，且俾序辭，僕晚間道，姑著師出世之自道隆述者之意，方之見託之重，以冠篇端，亦不知言爲錄之耽贅歟。錄且待耽贅而足歟。廣平宋某子京記。

### 送賢上人歸山序

僧至吳地，始于赤烏之年，法傳震旦，本乎少林之祖，曰五葉付于能者，一枝出于石頭，龍象倚裾，多生江漢之域，稻麻均衆，嗣發海潮之音，故南方勝宗，禪者稱首矣。開士賢公，以無礙之辯，徧參之學，深憫俗界之五濁，示現禪那之三輩，不待影策，踴躍天下之駒，全提海印，吹散雪山之象，天聖三祀，駐錫滢陽，黑白歸之，所在成市，難拒有情之請，遂唱別行之教，應病與大小之藥，隨扣發春容之音，淨名遺言，真入法門之不二，充倉與處，但覺歲計之有餘，衆德普聞，一方蘄嚮，始師與今參豫清源公，實領妙契，爲忘年之交，款茲同風，有命駕之適，戾止京寺，且過敝廬，予方欲以道理往來而勞苦之，師舉手曰：仁者勿作是念，誰爲煩惱，誰爲菩提，舉中則內外成三，言法則真妄有二，皆是宴坐，皆是道場，予聞師言，信受珍重，撤席未幾，俶裝告歸，江山白雲，巾鉢飛鳥，春郊蒼然，春柳盎然，送師者自厓而反，師自茲遠矣，寧于韁鎖塵譟，難

驚仕塗者。可希其轍跡哉。欽風不忘。附贅成說。謹序。

慶歷兵錄序

〔案〕仁宗本紀慶歷五年四月丁度爲樞副六年七月參知兵錄度所著

世之言兵者。本之軒轅。時書缺有間矣。夏商以來。乃能言之。緣井田作乘車。卽鄉爲軍。因田爲蒐。周法則然。外制郡國。內強京師。兵非虎符不得發。漢法則然。開府籍軍。混兵于農。使士皆士著。有格死無叛上。唐法則然。然晚周力分諸侯。其弊弱者常分。暴者常并。故公國相軋而亡。漢衰。權假強臣。其弊勢倖則疑。力寡則隨。故僭邦鼎峙而立。唐季亂生。置師。其弊樂姑息。厭法度。故羣不逞糜潰而爭。由是觀之。始未嘗不善。而後稍陵遲也。宋興。剗五姓餘亂。一天下之權。僭藩納地。梗帥嬰法。經武制衆。罔不精明。凡軍有四。一曰禁兵。殿前馬步三司隸焉。卒之銳而剽者充之。或挽彊。或踢張。或戈船突騎。或投石擊刺。故處則衛鎮。出則更戍。二曰廂兵。諸州隸焉。卒之力而悍者募之。天下已定。不甚恃兵。惟邊蠻夷者。時時與禁兵參屯。故專于服勞。間亦更戍。三曰役兵。羣有司隸焉。人之游而惰者入之。若牧置。若漕輓。若管庫。若工技。業壹事專。故處而無更。凡軍有額。居有營。有常廩。有橫賜。四曰民兵。農之健而材者籍之。視鄉縣大小而爲之數。有部曲無營壁。闕者輒補。歲一閱焉。非軍與不得擅行。此國家制軍大抵如此。然兵無常帥。師無常鎮。權不外假。力不他分。此其所以維萬方。懾四夷。鼓行無前而對天下者也。慶歷五年。今參預貳卿濟陽丁公。以壯猷宿望。進使樞省。惟是本兵柄按。軍志無不在焉。而叢紛几閣。非甚有紀。公乃搜次首末。鈎攷纖

微掇其攻守戰者。爲禁兵民兵錄五篇。合羣曹所分。擿諸條所隱。彙而聯之。部分班如也。離而判之。區處戢如也。彌衆而易見。愈詳而不繁。雖伍符猥并。邊鎖曲折。歲列廢置。月比秭登。披文指要。坐帷而判。蓋簡稽之決要。蒐乘之總凡。錄成。乃上于官。且俾序作者之意。謹按軍篇之首。公各述所由。前創後因。聖繼神承。既有第矣。近衛別錄。示有尊也。餘軍不載。畧所緩也。文約事明。成一王法。惟公達練多聞。以忠力自結于上。處機宥不周歲。擢貳鉉台。曝誠明。翊權綱。有德有言。天子之寶臣歟。





